

## JESUKRISTO VXYAAWA'JA'S KAAJIYU'JNI

<sup>1</sup> Naa txã'wě Dxus kaajiyu'jnisa' Jesukristo's, açã' Jesukristo' txã'sna selpisaatxku kaajiyu'jwa'jsa yu' naa ensu seena' yũuwa'ja's, kxajk Jesukristo' txã'sna selpisáa Juana's kaajiyu'j teeçx angela's kwe'we'jçxa. <sup>2</sup> Txãa pa'gak Juana' Dxus yuwe isasa's we'we Jesukristo kaavxya'ja'the uyni's jxuka, txãasa ãsxĩinisame'. <sup>3</sup> Naa pa'ga na'sna leeĩsa' nxusmée weçxana yaakxwa'jsata', açã' Dxus yuwe ayte na'wě fxi'jni' txã'sna leeĩçte wěse'jsawa isasa yuhna sũhna yajkxçxa kxtey yuusa' weçxana yaakxwa'j ji'phta'. Txã'wěme' kĩhwa seena' kxtey yuuwa'j ena' utxaaça'.

### *Dxus nasa siete ahte pkhaakhesatx weçxani*

<sup>4</sup> Juan yaasesa adxthu fxi'ja' Asia kiwete Dxus luuçx siete ahte pkhaakhesawe'sxtxi weçxana. Dxus yakh ewçxáa mfxi'zewe. Txã' nyafxíiwa txãáiçxáak yu', sa' açxwa txãáiçxá', sa' txãáiçxáa багаçxtewa nes yuuna. Sa' Dxus tasxte ũssa siete espíritusawe'sx pu'çxnitxwa mpa'gawe. <sup>5</sup> Sa' txã'wěy Jesukristo pu'çxni'swa mpa'gawe. Txã' Dxus yuwe's jxuka pta'sxsa' txãak uuçxawa ki' ãtxĩ yuu nyafxte, sa' açxha' txãa jxkaajxa' ãjãwa'jsa' naa kiwete jxkaahsawe'sxtxi. Kristo' kwe'sxtxi's peeygãhçxa kwe'sx pkaltxi's txajx eeju pkhi'kxku. <sup>6</sup> Txã'wě yũuçxak kwe'sxtxi's jxkaahsa vxite' sacerdote

vxitçxa nvxiht Dxusa's selpikahn. Sa' Kristo yuuçxáa kíhtewa jxuka ãjása jxtuhthe yuuwa'jsa' bagaçxtewa.

<sup>7</sup> Txã'sa' mthegwe, tãaphte yuja'. Txã'sa' jxukaysa uyuutxna, txã'sna kpã'vxit-sawa. Sa' uyçxa' naa kiwete nasa jxukaysa ù'netxna. Isath we'we', txã'wẽ yuh yuutxna.

<sup>8</sup> Kwe'sxtxi nwe'wesa' ma'wẽ yũuwa'ja'swa ãjãwa'jsa we'weçxa': Adxa' naa kiwe meetey ùsyã'th yu', sa' bagaçxtewa nes yuuwa'jsath pçuwa'jsamée jĩ'k. Txã' nyafxíiwa txãak yu', sa' ãçxwa txãaiçxá', sa' txãaiçxáa bagaçxtewa nes yuuna.

### *Dxus Nçxi'k nasa yuusáa vxyaani*

<sup>9</sup> Adxa' Juan i'kwe'sx yakthẽ'th. Txãasa i'kwe'sx na'wẽy ja'daçxah pxthaa yuuwa'ja'swa jxpa'gasath, sa' Dxus jxkaahni ena'swa jxpa'gasath i'kwe'sx na'wẽy. Sa' Jesukristo' kíhtewa wantãywa'ja's ùsku txã'snawa i'kwe'sx na'wẽy jxpa'gasath. Nawa naasáa Dxus yuwe's Jesukristo kaajiyu'kh txã'sna pta'sxpa'ga yuuçxáa adxa' preesuth ùsu' kiwe Patmos yaasesa yu'pxãhte u'pu'k kxtee. <sup>10</sup> Sa' teeçx ki'sen ente' Dxus Espiritu aphniith yuu, sa' adx e'ste trompeta's tukani na'wẽ seena' sus we'weni wẽse'th. <sup>11</sup> Txã' na'jĩ'k:

—Kĩh yuhwa meetey adxa' ùsyã'th yu', sa' bagaçxtewa nes yuuwa'jsath. Aça' idx uyuuçgu txãatxi's eçte fxi'jçxa mkaah Dxus luuçx si-ete ahte pkhaakhena ùssa Asia kiwetewe'sxtxi, Efxeso, Esmirna, Pérgamo, Tiatira, Sardis, Fxiladelfxia, Laodicea txãa çxhabetewe'sxtxi

jĩte', <sup>12</sup> ¿Kimki'k txã'wẽ we'we? sũhçxa yu'thegçxa', uythu bela txaahnisa sietetx ũsu' vxyuu behçxaçxáasa. <sup>13</sup> Sa' txãa bela txaahnisa ksxavxyte Dxus Nçxi'k nasa yuusáa na'wêsak ũsu', ropa çxida vxiçte kĩhsa athçxa, jxtudni-sawa vxyuu behçxaçxáasa peçxute kãh tapesak ji'phu'. <sup>14</sup> Sa' dxkhas yu' khas ew çxihme na'wẽtx yu', meeçxawa yãdx na'wẽ çxihme. Sa' yafx yu' ipx beesa na'wẽtx yu', <sup>15</sup> naapkaçxha' txajx çxida yu', çama's ipxte aaçxa'jni na'wẽtx zhiçxkwe kwentete'. Aça' txajx we'weni yu' yu'wala seena' susni na'wẽk pthũuse'. <sup>16</sup> Txajx kusete yu' siete estrelxatxku ji'phu', naapkaçxha' txajx yuwesu yu' espada pdxi'p seena' zeksak sêhna ũsu'. Aça' txajx dxi'p yu' sek kweethni na'wẽk eena' khikhyna ũsu'. <sup>17</sup> Aça' txã'wẽ uyçxa', txajx tasxga uuníi na'wẽth wete. Nawa txajx kuse paçuwe'sxa's adx kajkwete peekizeçxa na'jĩ'k:

—Ūukhnu, naa kiwe meetey adxa' ũsyã'th yu', sa' bagaçxtewa nes yuuwa'jsath pçuwa'jsamée. <sup>18</sup> Uuçxawa ki' ãtxĩ yuusath. Uuwa'ja's peena yu' ji'phuya'mée adxthu knay, sa' uu kiwetewa kaafxĩ'ze'jme'nja, txãasa açxha' bagaçxtewa ãtxĩçxáa nes yuuwa'jsath. <sup>19</sup> Na'wẽ idx uygu txãatxi' mfxij, açxh uynisa ki' e'su vxite uyu-une'ga txãatxwa. <sup>20</sup> Adx paçu kusete siete estrelxatx uygu vxite' bela txaahni sietesatx txã'wêsa' na'wẽ kaajiyu'jsata': Txãa estrelxa' Dxus luuçx siete ahte pkhaakhena ũssatx yuwee pta'sxsa angeleswe'sxta', naapkaçxha' siete bela txaahnisa' Dxus luuçx siete ahte pkhaakhe-sawe'sxta' jĩ'k.

## 2

### *Efxeso çxhabtewe'sxtxi pta'sxni*

<sup>1</sup> Dxus luuçx Efxeso çxhabtewe'sxtxi jxpe'jsa Dxus angela's mfxi'j na'jïna: Paçu kuseju siete estrelxatx atçxa siete bela txaahnisa vxyuu behçxaçxáata' txãa ksxavxysu u'jusa we'weçxa' na'jï'k: <sup>2</sup> Dxus dxi'pte i'kwe'sx ma'wē fxi'zesatewa jxuka jiith. Wala yuh çxhãçxha mjïina wantäyna fxi'zesa i'kwe, sa' ewmeesa yuutxi'sa' jxpa'ga'çmée i'kwe. Txã'wē Jesus jxkaahnisatha'w jïna pa'jsawe'sxtxi'sa' jxpa'gamée kintewa ew jiyuya' yuwe paapëyi'i'kwe, sa' txã'wē yüuçxa' Jesus jxkaahnisamée ïsxïisatewa jiyu'i'kwe. <sup>3</sup> Wahtxmée adxna selpiipa'ga wala pxthaa yuuna wantäyna mjïiwa'j ji'phu'i'kwe txã'wē yüuni's adxa' jiith. <sup>4</sup> Nawa i'kwe'sx ähmée yüuni's we'wewa'j ji'pthu. Nyafxíi na'wē i'kwe wala peeygãawa'ja's ji'phu' txãa yu'sa' açxha' ji'phmée i'kwe. <sup>5</sup> Txãa pa'ga kïhtene'kwe jxpuba txãa pkala's nvxihtçxa Dxus tasxte misxawedwe, sa' nyafxíi ma'wēne'kwe peeygãasa yu' txã'wēy myüuwe. Txã'wē yüumeete', tud yuwe'nja i'kwe'sxtxi kastigäyya', sa' i'kwe'sx ksxavxyu bela txaahni's jxüna u'jçxa vxite ahte txaja'nja, pkaltxi nvxihtçxa Dxus tasxte sxawedmeete'. <sup>6</sup> Txã'wēçxawa na'wē yüuwa'j yu'sa' ew i'kwe yü'. Nikolaitawe'sx fxi'zeni yu'sa' açe'i'kwe txã'wēsa yu'sa' adxwa açe'th. <sup>7</sup> Kxtey nwēese'jwa'jsa üsçxa', mwēese'jwe Dxus Espiritu' na'wēk we'we' Dxus luuçxtxi: Dxus üsnite fxtüu taxx üsa' bagaçxte yuhwa peejxmée

yūnna nes yuusa txā' uumée kaafxi'ze'jsa'. Txā'sa' puuçu'nja ewmeesa yu'sa' nwēese'jmée jxuka knaysawe'sxtxi'sa' jī'k.

*Esmirna çxhabetewe'sxtxi pta'sxni*

<sup>8</sup> Dxus luuçx Esmirna çxhabetewe'sxtxi jxpe'jsa Dxus angela's na'jīna mfxi'j: Naa kiwe meetey ūsyā'kh yu' sa' bagaçxtewa nes yuuwa'jsa uuçxa ki' itxī yuuk txā' na'jī'k: <sup>9</sup> Dxus dxi'pte i'kwe'sx ma'wē fxi'zesatewa jxuka jiith. I'kwe'sx pxthaa yuuna kīhwa ji'phmée fxi'zeni txā'wē yūuni's jiith. (Nawa ew yajkxte yu' wala ji'phsa i'kwe.) Sa' Dxus luuçx meeçxawa Dxus luuçxtha'w jīna weeçx we'wesatxwa jiith. Nawa txā'wē yūusa' eçxthē'j nasa yuuçxáata'. <sup>10</sup> Pxthaa yuuwa'j pa'jana txā'sa' ūukhmeene'kwe. Eçxthē'ja' i'kwe'sx maaiitxi's karcelte txajana, i'kwe'sx jxukaysa ma'wē yūutewa jiyuya'. Aça' diez enpkaçx wala pxthaa yuuwa'j ji'phune'kwe. Nawa Dxus yakh txutemée mfxi'zewe uu entepkaçx, aça' adxa' itxī fxi'zewa'ja's ūsu'nja txā'wē ew fxi'zepa'ga. <sup>11</sup> Kxtey nwēese'jwa'jsa ūsçxa', mwēese'jwe Dxus Espiritu' na'wēk we'we' Dxus luuçxtxi: Ewmeesa yu'sa' nwēese'jmée jxuka knaysawe'sxa' Dxus yakh bagaçxte yuhwa peena yu' puutx uywa'jmeete yu' u'jmeetxna jī'k.

*Pérgamo çxhabetewe'sxtxi pta'sxni*

<sup>12</sup> Dxus luuçx Pérgamo çxhabetewe'sxtxi jxpe'jsa Dxus angela's na'jīna mfxi'j: Espada pdxi'p zeksa's ji'phsa' na'jī'k: <sup>13</sup> Dxus dxi'pte i'kwe'sx ma'wē fxi'zesatewa jxuka jiith. I'kwe'sxa' eçxthē'j jxkaahna ūsni ksxavxyte ūsçxawa, adx tasxu yu' txutemée i'kwe

fxi'ze'. Adx kaapiya'jni's pta'sxsa Antipas nakwe wala seena' pxtxaa i'kwe'sx ksxavxyte ikhni yuuk txāa enteçxāa yuhwa ũukhçxa adx yase's kxsusmée yu' yuumée i'kwe, kxteek eçxthē'j ũsu' nawa. <sup>14</sup> Txā'wētewa i'kwe'sx āhmée yūuni's we'wewa'j ji'pthu: Balaan kaapiya'jni's nwēese'jsawe'sxtxi i'kwe'sxa' iipe'ji'kwe Pérgamo çxhabte. Txāa Balaana' Balakha's ewmeek yu'kxpeh Israelwe'sxtxi's kaypuba'khan, txāasak Dxus itxīmeesatx weçxana tajkx ikhni çxiçxa's ũ'kaah, sa' pkał kazx yuuna fxi'zewa'ja'swa kaapiya'kh. <sup>15</sup> Sa' Nikolaitawe'sx kaapiya'jni's nwēese'jsawe'sxtxiwa iipe'ji'kwe. Txā'wēsa yuutxi's adxa' açe'th. <sup>16</sup> Txāa pa'ga pkala's nvxihtçxa Dxus tasxte misxawedwe. Txā'wēme' adxa' dud i'kwe'sx tasxna yuhçxa, txā'wē ewmée fxi'zesawe'sxtxi kastigaĩ'nja espada pdxi'p zeksa ji'pthu txāaju. <sup>17</sup> Kxtey nwēese'jwa'jsa ũsçxa', mwēese'jwe Dxus Espiritu' na'wēk we'we' Dxus luuçxtxi: Ewmeesa yu'sa' nwēese'jmée jxuka knaysawe'sxtxi's ũsu'nja maná ũ'nisa jxaawni ũsa' txā'sna. Sa' teeçx kwet çxihme ũsu'nja, sa' txāa kwette yu' yase u'sesa's fxi'jni yuuna kim yuhwa jiyunimeesa naasāa txāa kweta's jxpa'gasa yuuçxāa jiyuna jĩ'k.

### *Tiatira çxhabtewe'sxtxi pta'sxni*

<sup>18</sup> Dxus luuçx Tiatira çxhabtewe'sxtxi jxpe'jsa Dxus angela's na'jīna mfxi'j: Dxus Nçxi'k yafx ipx beeni na'wēsa ji'phsa txajx çxida çam na'wē kwentetesa ji'phsa na'jĩ'k: <sup>19</sup> Dxus dxi'pte i'kwe'sx ma'wē fxi'zesatewa jxuka jiith.

I'kwe'sx peeygãani, ũuste jxpubamée Dxusa's yajxna fxi'zeni, wa'lmée selpiina fxi'zeni txã'wě yũuni's jiith. Sa' nyafxii meeçxa' açxha' thaakwe mjĩina ũsi'kwe. <sup>20</sup> Nawa i'kwe'sx ähmée yũuni's we'wewa'j ji'pthu: Txãa u'y Jezabela's ma'ji'çmée i'kwe, txãa u'ya' Dxus kwe'we'jni'sthu pta'sxi' jĩçxa adxna selpisaatx kaypuba'ja'kh pkal kazxsate kaafxi'ze'jna, sa' tajkx ikhçxa Dxus itxĩmeesatx weçxawa'ja' jĩnak kaapiya'ja'. <sup>21</sup> Adxa' txãa u'ya's en ũsthu txãa pkala's nvxihtçxa Dxus tasxte sxawed-kahn. Nawa txã'wě yũuya' wa'lçxa txãa pkal kazxsateyçxáak fxi'ze'. <sup>22</sup> Txãa pa'ga adxa' txãa u'ya's kastigaĩ'nja, aça' txãa u'y kaapiya'jni's nvxihtmeeçxa', txãawe'sxwa seena' yuh px-thaa yuuwa'j ji'phutxna. <sup>23</sup> Sa' txãa u'y luuçxtxi's ikhe'nja. Txã'wě yũute Dxus luuçxa' jxukaysa jiyutxna adxa' txãawe'sx ũus dxi-iju yaakxni's jxuka jiyusatewa. Sa' i'kwe'sx teeçxsa na'wěçxah kĩh yũusatewa, ka'tuwa txã'wěy yu'nja. <sup>24</sup> Nawa Tiatira çxhabte ũssa maawa txãa u'y kaapiya'jni's nwěese'jsamée vxite' na'wě eçxthě'j kaapiya'jni kim yuhwa jiyu-nimeesa jĩ'tx txã'snawa nwěese'jsameewe'sxa' adx yu'kxpehwa'j peejxmeei'kwe. <sup>25</sup> Nawa ew fxi'zewa'ja's peçxkananuwe adx sxawedp-kaçx. <sup>26</sup> Sa' ewmeesa yu'sa' nwěese'jmée kĩhtewa jxuka knayçxa adx jxthãasniçxá's nmeh entepkaçx kxtey yuuna fxi'zesa yu'sa' nasa mteewe'sxtxiwa jxuka jxkaajxa' äjãwa'ja's ũsu'nja, <sup>27</sup> adx Tatawa ma'wěga adx jxkaajxa' äjãwa'ja's ũs txã'wěy. Aça' nasa jxukaysatx

seena' yuh juuna' yuuna jxkaajana, kiwee mitxh açxamée ewsa's ma'wēga ya'udu' txã'wēyçxáa yuuni yuutxna. <sup>28</sup> Sa' khikhiiçte kãasa estrelxa'swa ũsu'nja. <sup>29</sup> Kxtey nwēese'jwa'jsa ũsçxa', Dxus Espiritu' na'wēk we'we' Dxus luuçxtxi txã'sna mwēese'jwe jĩ'k.

### 3

#### *Sardis çxhabetewe'sxtxi pta'sxni*

<sup>1</sup> Dxus luuçx Sardis çxhabetewe'sxtxi jxpe'jsa Dxus angela's na'jĩna mfxi'j: Dxus tasxte ũssa sietesatx jxkaahsa txajx kusete yu' siete estrelx-atx atçxa ũssa na'jĩ'k: Dxus dxi'pte i'kwe'sx ma'wē fxi'zesatewa jxuka jĩith. İtxĩ ũstha'w jĩna jxtuhthe i'kwe fxi'ze', nawa uuníi na'wē ũsi'kwe. <sup>2</sup> Çxhãçxha fxi'zewa'ja's miijajkxwe. Txã'wēme', Dxus yakh fxi'zewa'j yu'sa' kĩhnawa jxuka ivxiituwa'theçxáa yã'j ũsi'kwe. İiuythu Dxus dxi'pte i'kwe'sxa' ewmée i'kwe fxi'ze'. Pkala's nvxihtçxa Dxus tasxte misxawedwe. <sup>3</sup> Sa' i'kwe'sxtxi ew kaapiya'jni's yajkçxçxa txã's yuuçxáana kxtey yuuna mfxi'zewe. Txã'wē jxpa'yakxmeete', adxa' kus peswée na'wēçxáa pa'ja'nja i'kwe'sx tasxte, kim yuhwa jiyunimeete. <sup>4</sup> Txã'wēçxawa kxtee Sardis çxhabte maz nasa yu' athni ropa khũuçxhi'jnimeesatx ji'phi'kwe, aça' txãawe'sxa' adx yakh fxi'zetxna ropa çxihmesa athçxa, txãawe'sxa' txã'wē fxi'zewa'jsata'. <sup>5</sup> Ewmeesa yu'sa' nwēese'jmée kĩhtewa jxuka knaysawe'sxa' ropa çxihmesa kaathe'jni yuutxna. Aça' txãawe'sx yasetxi's khukhme'nja bagaçxte yuhwa uuwa'jmée İtxĩ



fxi'zewa'j libruju, wejxwa txãawe'sx yasetxi's pta'sxna kaajiyu'ju'nja adx Tata vxite' txajx angeswe'sx dxi'pte. <sup>6</sup> Kxtey nwēese'jwa'jsa ūščxa', Dxus Espiritu' na'wēk we'we' Dxus luuçtxxi txã'sna mwēese'jwe jī'k.

*Fxiladelfxia çxhabtewe'sxtxi pta'sxni*

<sup>7</sup> Dxus luuçx Fxiladelfxia çxhabtewe'sxtxi jxpe'jsa Dxus angela's na'jīna mfxi'j: Jxkaahsa Davxid lxavxi's ji'phsa txãa phadeyā'the', kim yuhwa apha'çme', sa' txãa aphte', kim yuhwa phade'çme' txã'wē isasa's pta'sxsa' na'jī'k: <sup>8</sup> Dxus dxi'pte i'kwe'sx ma'wē fxi'zesatewa jxuka jiith. I'kwe'sx fxi'zewa'j dxi'ja's phadeçxa nvxihtthu txã'sa' kim yuhwa aphyā' ājāmeena. I'kwe'sxa' Dxus dxi'pte açxamée i'kwe çxhãçxha fxi'ze', nawa adx pta'sxni yu'sa' kxtey yuuna ūsi'kwe adx yu'sa' ahçemée. <sup>9</sup> Aça' txãa pa'ga i'kwe'sx tasxte peejxūkwekahn kaja'nja eçxthē'j nasa judiumeeçxawa judiutha'w jīna īsxīisawe'sxtxi, kxah txãawe'sxa' jiyutxna adxa' i'kwe'sxtxi's peeygāasatewa. <sup>10</sup> Kīhtewa jxuka wantāywa'ja's adx jxkaahni's kxtey nwēese'ji'kwe, txãa pa'ga adxa' jxaawu'nja i'kwe'sxtxi's naa kiwete jxukaysawe'sx ma'wē yūutewa jiyuya' nxuswa'j en pa'jana naa kiwe uta txãa ente. <sup>11</sup> Txaçxmey sxawedu'nja. Ew fxi'zeni's mpa'yajkxwe, kxah txã'wē fxi'zepa'ga i'kwe'sxtxi ūswa'j ūsa' txã'sna kim yuhwa kusa'jmeena. <sup>12</sup> Ewmeesa yu'sa' nwēese'jmée kīhtewa jxuka knaysawe'sxtxi's adx Dxus tasxtewe'sx seena' çxhãçxhasa vxitu'nja, aça' багаçxte yuhwa kasehmeetxna txãajū. Sa'

txāawe'sx kakwete fxi'jçxa ki'pu'nja adx Dvus yase vxite' adx Dvus yujuni çxhab yase Jerusalen u'sesa cielutewe'sx txāatx. Sa' adx yase u'sesa'swa txāawe'sx kakwete yuu fxi'jçxa ki'pu'nja. <sup>13</sup> Kxtey nwēese'jwa'jsa ūsçxa', Dvus Espiritu' na'wēk we'we' Dvus luuçxtxi txā'sna mwēese'jwe jī'k.

*Laodicea çxhabetewe'sxtxi pta'sxni*

<sup>14</sup> Dvus luuçx Laodicea çxhabetewe'sxtxi jxpe'jsa Dvus angela's na'jīna mfxi'j: Īsxīsamée kīhtewa jxuka isasaçxá's we'wesa kīh yuhwa meetey ūsyā'kh yu' txā' na'jī'k: <sup>15</sup> Dvus dxi'pte i'kwe'sx ma'wē fxi'zesatewa adxa' jxuka jīith. Dvusa's ūusuh jxuka yaakxpa'gamée fxizewa meeikwe, sa' açxawa meeikwe. Txā'wē yā'jçxa', jxukate fxize yuuwaç wejx ewna, meeçxawa açxa yuuni ewna. <sup>16</sup> Nawa fxizewa meeikwe, sa' açxawamée wejkuēçxáa bajxi'kwe, txāa pa'ga adx yuwejū i'kwe'sxtxi pugaya'wath. <sup>17</sup> I'kwe'sxa' wala ji'phsaçxa kīh yuhwa peejxmée wala ewçxáa fxi'zena ūstha'w jī'i'kwe. Nawa kīh yuhwa ji'phmée sūpxçxáa uyya' ājāmée nxuste wētmeete yuuçxáa fxi'zeni yu'sa' jiyumée ūsi'kwe. <sup>18</sup> Txāa pa'gath na'wē yu'kxpeje': Wala ji'phsa yuu wēeçxa', adxa'sçxaçxáa mweywe vxyuu beh ew pheu'jnisa. Sūpxçxáa fxi'zeya'mée athwa'j ropa çxihmesanawa mweywe. Sa' yafxtewe'sx yu'çewa mweywe. <sup>19</sup> Adx peeygāanisatxi's juuna'th we'wena yu'kxpeje' jxukaysatx. Txā'wē Dvus yakh çxhāçxha fxi'zeya', pkala's nvxihtçxa Dvus tasxte misxawedwe. <sup>20</sup> Mwēese'jwe,

adxa' vxitxte pa'yana ũsthu. Aça' maawa adx we'weni's wēse'jçxa ka'ga'the', kxtee u'kaçxa txãa yakh fxi'ze'nja, aça' txãawa adx yakh fxi'zena. <sup>21</sup> Ewmeesa yu'sa' nwēese'jmée kīhtewa jxuka knaysawe'sxtxi's adx jxkaahna ũsnite ih ũswa'jsa vxitu'nja, adxwa ma'wētka ewmeesa's nwēese'jmée jxuka knayçxa adx Tata jxkaahna ũsni pukate kaçx txã'wēy. <sup>22</sup> Kxtey nwēese'jwa'jsa ũsçxa', Dxus Espiritu' na'wēk we'we' Dxus luuçxtxi txã'sna mwēese'jwe jī'k.

## 4

### *Dxusa's cielute weçxana ũsni*

<sup>1</sup> Txãa e'su' ki' thegçxa' uythu cielute vxitx phateçxa ũste. Aça' nyafxii we'weni na'wēy we'weni ki' wēse'th trompeta's seena' sus tukani, sa' na'jī'k:

—Ay ēete myuh, kxtee kaavxya'ja'jya'wath naa e'su kīhçxa yuune'thewa txāatx.

<sup>2</sup> Txã'jīçpkaçxha' txãa dudtey Dxus Espiritu aphniith yuuna pa'j, sa' uythu cielute jxkaahna ũsnisa's. <sup>3</sup> Txãa jxkaahna ũsnite yu', teeçx kaçxçxa u'pu'k, sa' kxtee u'psa yu' iiméh seena' zhiçxkwe zmeena' kuh jwed khikhyna u'pu'k. Sa' txãa peeku'jsu yu' kxthūus iiméh zhiçxkwe kweethna ũsu'k. <sup>4</sup> Txãa jxkaahna ũsni pukasu yu' vxite jxkaahna ũsni weintikuatro āhtx ũsu', aça' kxsū yu' Dxus luuçxtxi jxkaahsa weintiku-atrosatx u'pu', ropa çxihme athçxa dxikthesu yu' vxyuu bee korona ji'phsa. <sup>5</sup> Txãa jxkaahna ũsniyū yu', kpi'sx kweneni na'wēsak kasehna ũsu' seena' susna, sa' jxkaahna ũsni dxi'pte yu'

siete ipx pki'tanitx behna ũsu' txãa yu' Dxus tasxte ũssa siete espíritusawe'sxtxi yu'. <sup>6</sup> Txãa dxi'pteýçxáa mar na'wēsak zhiçxkwe khikhyna ũsu'.

Txãa jxkaahna ũsni pxãhsu vxite' peeku'jsu yu' Dxus vxitnisa itxīsa pahztxi ũsu', kakwete jxuka yafxçxaçxáa ji'phsa. <sup>7</sup> Txãa pahzsa nyafx-tewe'sxa' león na'wēk yu'. E'stewe'sxa' tulu na'wēk yu'. Tekhtewe'sxa' nasa na'wēk dxi'p ji'phu'. Aça' pahztewe'sxa' uh na'wēk fxuusa yu'. <sup>8</sup> Txãa Dxus vxitnisa pahzsa' teeçxsa na'wēçxah seis fxu ku'tatx ji'phu', sa' yafxçxaçxáa kakwete jxukatx ji'phsa yu'. Txãawe'sxa' kus ma'k yuu en ma'k yuu nawa bagaçxte yuhwa wahtxmeetx na'jīna ũsu':

Dxus iiméh seena' walasa,  
 Kīh pkal yuhwa ji'phmée iiméh seena' atesa,  
 Nyafxíiwa txãak yu', sa' açxwa txãaiiçxá',  
 Sa' txãaiiçxáa bagaçxtewa nes yuuna jīnatx  
 we'wena nes yu'.

<sup>9</sup> Sa' kxtee jxkaahna ũsnite kaççxa bagaçxteçxáa yuhwa uumée nes yu-uwa'jsa's Dxus vxitnisa txã'wē tuuthe'jna weçxaaçpkaçxha', <sup>10</sup> Dxus luuçtxxi jxkaahsa weintikuatrosawe'sxa' bagaçxteçxáa yuhwa uumée nes yuuwa'jsa tasxte peejxūkweçxa txãawe'sx koronatx txajx tasxte ki'pçxa na'jīnatx weçxana tuuthe'je':

<sup>11</sup> Kwe'sx Dxus idx yuuçxáa jxpa'gawa'jsag weçxana tuuthe'jni's,  
 Txãa pa'gately idxçxaçxáag kīhnawa jxuka vxit,  
 Aça' iidx peeygãhçxa taki'jnisaçxaçxáa ũsta'  
 jī'tx.

## 5

*Libru's phadewa'jsa*

<sup>1</sup> Jxkaahna ũsnite kaçxçxa u'psa' paçu kuseju teeçx eç fxi'jnisa atçxa u'pteth uy. Txãa eç yu' ekaju dxiiju jxuka fxi'jçxa wala ew pelçxa siete selxo yakhku aphni yu'. <sup>2</sup> Sa' teeçx angel iiméh seena' çxhãçxhasa ũste uythu, txãa yu' na'jĩnak paapëyi' sus we'wena:

—Txãa eç siete selxo yakh aphnisa's çkim sudeçxa phadeya' ãjãkx? jĩ'k. <sup>3</sup> Nawa cielutewe'sx, naa kiwetewe'sx, naa kiwe dxi-ijuwe'sx kimçxáa yuhwa txãa eça's phadeya' ãjãwa'jsameetx yu', sa' thegya'çxáa yuhwa ãjãwa'jsameetx yu'. <sup>4</sup> Txã'wẽ txãa eça's phadeçxa thegya'çxáa yuhwa ãjãwa'jsamée yu-upa'ga, adxa' wala ũ'nena ũsu'th. <sup>5</sup> Aça' kxtee jxkaahna ũssa teeçxsa' na'jĩ'k:

—Jwee yu' ũ'nenu. Teeçx ũsa' Juda nwe'sx, jxkaahsa Davxid ji'thewe'sx wala jxtuhthesa txã' ewmeesa's jxuka knayku, txãa siete selxotx sudeçxa eça's phadeya' ãjãya' jĩ'k.

<sup>6</sup> Txajũ' jxkaahna ũsni pxãhte vxite' Dxus vxitni itxĩsa pahz ũsu'tx vxite' Dxus luuçxtxi jxkaahna ũssawe'sx txã'wẽsawe'sx ksxavxyte Piisxakuẽ na'wẽsa yujuçxa ũste uythu. Txãa yu' kpã'vxitçxa ikhni snxalwa ji'phu'k, sa' siete kaaçxu siete yafxku ji'phu'. Txãa siete yafx yu' na'wẽ Dxus tasxte ũssa siete espiritutx naa kiwete jxuka kaahni yuutx txãatx yu'.

<sup>7</sup> Txajũ' txãa Piisxakuẽ jĩnisa' u'jçxa jxpa'gak na'wẽ jxkaahna ũsnite u'psa' paçu kusete eç yaat yu'k txãa eçna. <sup>8</sup> Txajũ' txãa eça's

jxpa'gaçpkaçxha', Dxus vxitni pahz ïtxïsa vxite' Dxus luuçxtxi jxkaahsa weintikuatrosawe'sxa' peejxūkwetx txāa Piixakuē jīnisa tasxte. Txāa jxkaahsawe'sxa' teeçxsa na'wēçxah tukani arpa ji'phu'tx, sa' vxyuu bee kopawa ji'phu'tx. Txāa vxyuu bee kopasū yu' dxuus yatte kabnisa inciensoçxaçxá's uta abnisa'stxi ji'phu'. Aça' txāa yu' Dxusa's peçxkanamée puutx we'wena ūsni jīnisak yu'. <sup>9</sup> Sa' memtxi teeçx mem u'sesa na'jīna:

Idxa' txāa eça's jxpa'gaçxa selxotx sudeya' ājāwa'jsag,

Txāa pa'gatey ikhni yuuçxa iidx eeju kwe'sxtxi's weygu

Maa nasa ma'wēsa, yuwe ma'wē we'wesa, mteewe'sxwa jxuka Dxus luuçx yuuya' ājākahn.

<sup>10</sup> Sa' kwe'sxtxi's jxkaahwa'jsag vxitna pa'j vxite' sacerdote kwe'sx Dxus tasxtewe'sx,

Aça' naa kiwete jxkaajxa' ājā'nja'w jī'tx.

<sup>11</sup> Txajū' ki' thegçxa' wēse'th angeleswe'sx iiméh seena' kuhsa we'weni's. Txāawe'sx yu' jxkaahna ūsni peeku'jsu vxite' Dxus vxitni ïtxïsa vxite' Dxus luuçxtxi jxkaahna ūssawe'sx peeku'jsutx ūsu'. Txāawe'sxa' iiméh seena' wala kuh yu'tx. <sup>12</sup> Sa' na'jīnatx sus we'we':

Piixakuē na'wē ikhni yuunisa's bagaçxtewa pu'vxitumée weçxana tuuthe'jna ūswa'ja'.

Sa' txāaçaçxáa jxuka jxpa'gawa'jsa', jxkaahsa yuuwa'j, wala seena' ji'phsa yuuwa'j.

Kīhtewa jxuka jiisa, iiméh çxhāçxhasa txā'wē yuuwa'jsa' jī'tx.

13 Sa' Dxus taki'jni cielutewe'sx, naa kiwetewe'sx, naa kiwe dxiijuwe'sx, martewe'sx kxtee kīhçxah ũstxna txã'wěsa jxuka na'jīna we'weni'swa wěse'th:

Weçxana tuuthe'jwa'ja' jxkaahna ũsnite kaçxçxa u'psa's vxite' Piisxakuē na'wě ikhni yuuk txã'sna.

Sa' jxtuhthe jxkaajxa' ājāwa'jsa' багаçxtewa jī'tx.

14 Aça' txã'jīçpkaçxha', Dxus vxitni itxīsa pahzsa':

—Txã'wě kxtey yuuna jī'tx. Naapkaçxha' Dxus luuçxtxi jxkaahsa weintikuatrosawe'sxa' pee-jxūkweçxa weçxana tuuthe'je'tx багаçxteçxáa yuhwa uumée nes yuuwa'jsa's.

## 6

### *Siete selxotx sudeni*

1 Txajū' uythu Piisxakuē jīnisa' siete selxo nyafxtewe'sxa's sudeçte, sa' wěse'th Dxus vxitni itxīsa teeçxsa' seena' sus na'jīna:

—Yuhçxa mtheg jīni's. 2 Aça' txã'wě wěse'jçxa', thegçxa uythu teeçx jiba çxihmesa's, kxtee a'jsa yu' kusete ũpanisa arko yaasesa'sku jī'phu'. Txajū' txã'sa' teeçx koronak ũsni yuu, aça' txāa yu' kīhtewa jxuka puiiya' jīisak kaseh, mteewa puiiçxa knaywa'jsa.

3 Txajū' Piisxakuē jīnisa' vxite selxo's sudek e'stewe'sxna, aça' wěse'th Dxus vxitni itxīsa e'zsatewe'sx na'jīna:

—Mtheg jīni's. 4 Sa' uythu vxite jiba behsa kasejeçte, aça' kxtee a'jsa yu's jxkaahnik yuu, naa kiwete wēt fxi'zeni's ivxiitute nasaa pwe'sx

puutx ikhna u'khan. Sa' teeçx espada walasak ũsni yuu.

<sup>5</sup> Txajũ' Piisxakuẽ jĩnisa' vxite selxo's sudek tekhtewe'sxna, aça' wẽse'th Dxus vxitni ãtxĩsa tekhsatewe'sx na'jĩna:

—Mtheg jĩni's. Aça' uythu vxite jiba khũçxsa's aça' kxtee a'jsa yu' kusete isanisa balansa yaas-esa'sku ji'phu'. <sup>6</sup> Sa' wẽse'th Dxus vxitni ãtxĩsa ksxavxyu teeçx na'jĩna we'weni's:

—E'z libra skuutxhçxáana teen mjĩinite ãhpa'ga txweywa'j yuuna, sa' seis libra cebada'swa txakwey pa'gate txweywa'j yuuna. Nawa aceite vxino txã'wẽsa yuutxi'sa' ivxiitupu'n jĩ'k.

<sup>7</sup> Txajũ' Piisxakuẽ jĩnisa' vxite selxo's sudek pahztewe'sxna, aça' wẽse'th Dxus vxitni ãtxĩsa pahzsatewe'sx na'jĩna:

—Mtheg jĩni's. <sup>8</sup> Aça' txã'wẽ wẽse'jçxa' thegçxa uythu teeçx jiba seena' ũukhũukhsa's, aça' kxtee a'jsa yu' Ikhsa jĩna kxsusni yasek ji'phu'. Naapkaçxha' txãa e'ste' uusaawe'sx yu-juni jĩnisak vxyaa. Txãa jibate a'jsa yu'sa' jxkaah-nik yuu naa kiwete nasatx puupxãhn áatuw ikhkahn gweçxa vxitçxa wẽjẽ kaapa'ja'jçxa weewa txã'wẽy kaapa'ja'jçxa yu'kh eçx ju-una'sawa kaapena'jçxa.

<sup>9</sup> Txajũ' Piisxakuẽ jĩnisa' vxite selxo's sudek tahçtewe'sxna. Aça' Kristo's selpiipa'ga ikhni yuutx txãawe'sxçxaçxáa altal tasxte ũsteth uy.

<sup>10</sup> Sa' txãawe'sxa' na'jĩnatx sus we'we':

—Kwe'sxtxi jxpe'jsa atesa idxa' kĩhtewa kxtey yuusáa çmakwe txaçx jxthẽeyuuya'waga,



kwe'sxtxi ahçeçxa ikhtxi txãawe'sxtxi kastigãyya'? jïte', <sup>11</sup> pasçxa':

—Ăçxhîi yu' ũuçxkwe uythâsna jxkaasena meswe, Kristo's selpiipa'ga i'kwe'sx na'wëy ikhni yuuwaj peejxta' txãawe'sxtxi kxtey yuuna jxã'phkaçx jïçxa', ropa çxihmesatx kaathe'jni yuu.

<sup>12</sup> Txajũ' Piisxakuẽ jïnisa' vxite selxo's sudek seistewe'sxna. Aça' uythu seena' ehd u'jweçte seka' jxuka khũçx kâjk kweethmeepkaçx, a'tewa jxuka ee na'wëk beh yuu. <sup>13</sup> Naapkaçxha' cielute estrelxa' ũsxitx naa kiwete, fxtũ yünwa ma'wëta wejxa çxhãçxha kêese'the jxuka ũsxi' txã'wëtx yuu. <sup>14</sup> Aça' cielu' eç na'wë jxuka pelni yuuçxa vxyaame'. Naapkaçxha' thã'j vxiç vxite' ïkh pxãhsu kiwe u'psa jxuka upen-itx yuu êse'sete. <sup>15</sup> Aça' naa kiwete jxkaah-sawe'sxa' wala ũukhçxa kiwe kafxsu vxite' kwet kafxsu jxuka jxsũuthxtxi, walasawe'sx, ji'phsawe'sx, npiičthë'jwe'sx, jxtuhthesawe'sx, vxite' patron kusete selpiina fxi'zesawe'sx vxite' patron ji'phmëe wët fxi'zesawe'sx jxukatx txã'wë yũu. <sup>16</sup> Sa' txã'wë yũuçxa thã'j vxiç vxite' kwet penxatx na'jïnatx we'we':

—Kwe'sxtxi jxuka akaaççxa kaavxya'ja'jnu na'wë jxkaahna u'pa' txajx dxi'pte, vxite' Piisxakuẽ jïnisa seena' yuh kastigãyya' ũsa' txã'wësa dxi'pte. <sup>17</sup> Txã'wëme', txã'wë seena' kastigãywa'j en ãjk, aça' ¿kim kxte' wantãyya' ãjãkx? jï'tx.

## 7

*Israelita ji'jwe'sx iisawa'jniitx yuu*

<sup>1</sup> Txãa e'su' pahz angeleswe'sxtxith uy, txãawe'sxa' naa kiwe peeku'the puutx pahz ahtetx yujuçxa ũsu', naa kiwete pahz ajũ wejxa kasehsatx ka'ga'jmée yupna, naa kiwete, marte, yu'khsu mtee yuhwa wejxakahmen. <sup>2</sup> Sa' vxite angel uythu txãa yu' sek kãani ju'guk yuh yu', Dxus ïtxãsa selxo's atçxa. Txãa Dxus angela' susku we'we pahz angeleswe'sx ũsu'tx naa kiwe vxite' mar txãatx suwwa'jsatx na'jina:

<sup>3</sup> —Naa kiwe, mar, yu'kh mtee yuhwa açxhii yu' suwnuwe, Dxusna selpisaawe'sx dxikthesu kwe'sx iisawa'jmeyna yu' jĩ'k.

<sup>4</sup> Txajũ' wëse'th Israelita ji'jwe'sx iisawa'jnisa jxuka yu' ciento kuarenta y kuarto miltxi yu'. <sup>5</sup> Judá ji'j, doce mil; Rubén ji'j, doce mil; Gad ji'j, doce mil; <sup>6</sup> Aser ji'j, doce mil; Nefxtalí ji'j, doce mil; Manasés ji'j, doce mil; <sup>7</sup> Simeón ji'j, doce mil; Levxí ji'j, doce mil; Isakar ji'j, doce mil; <sup>8</sup> Zabulón ji'j, doce mil; José ji'j, doce mil; Benjamín ji'j, doce mil; txãawe'sxtxi jxukaçxah yu' txazkuêe yu'.

### *Maa nasawa Dxus nwe'wenisawe'sx*

<sup>9</sup> Txãa e'su' ki' thegçxa' nasa iiméh wala kuh uythu. Txãawe'sxa' maa nasa ma'wësa majũwe'sxwa jxukatx yu', yuwe fxiyfxiyçxah we'wesa. Sa' Piisxakuê jnisa jxkaahna u'pni peeku'jsutx yujuçxa ũsu'. Txãawe'sxtxi' kim yuhwa isaya' ajãmeeta', iiméh wala kuh yu'tx txãa pa'ga. Sa' ropa çxihmesa athçxa kusesu yu' lamus eçnatx yaat yu'. <sup>10</sup> Txãawe'sx jxukaysa na'jinatx sus we'we':

Kwe'sx Dxus jxkaahna u'pa' vxite' Piisxakuẽ  
jĩnisa txãawe'sx yuuçxáatx ewte  
neeyũuwa'ja's ũs jĩ'tx.

11 Aça' Dxus jxkaahna ũsni peeku'jsu vxite'  
Dxus luuçxtxi jxkaahsawe'sx peeku'jsu vxite'  
Dxus vxitni ĩtxĩsa pahz ũsu'tx txãa peeku'jsu an-  
geleswe'sx yujuçxa ũssa' jxkaahna ũsni ju'gu ki-  
wete pa'j kĩiçhuçxa Dxusa's na'jĩnatx neewe'we':

12 Weçxana tuuthe'jwa'ja' kwe'sx Dxusa's.

Txãaçxáa kĩhtewa jxuka jiisa'.

Txã' багаçxtewa çxhãçxhasa jxtuhthe jxkaajxa'  
ãjãwa'jsa' jĩ'tx.

13 Txajũ' Dxus luuçxtxi jxkaahsa teeçxsa'  
na'jĩnak adxa's pẽjx:

—Na'wẽ ropa çxihme athçxa ũsta' txãawe'sxa'  
¿kĩmtxna, sa' majũ yuusatxna? jĩte':

14 —Txãawe'sxtxi' idxiíçxáa jiine'ga jĩnath pas.  
Aça' txã' na'wẽk pta'sx:

—Txãawe'sxa' iiméh seena' wala nxuste  
skhẽwsaata', sa' txãawe'sx athni ropatxi's  
thethçxa Piisxakuẽ jĩnisa ikhni yuuk txajx eete  
yaatesata'. 15 Txãasa Dxus jxkaahna ũsni tasxte  
ũsta', en ma'k yuu meeçxa' kus ma'k yuu nawa  
bagaçxtewa selpiina nes yuuwa'jsata'. Aça'  
kxtee jxkaahna u'psa yakh ũssa' kĩhte yuhwa  
peejxmée fxi'zetxna. 16 Txãa pa'ga txãawe'sxa'  
ãçxha' pthaa yuumeetxna wẽena yũ'wẽena.  
Sa' sektewa çxhavxyna yaaçxana fxi'zemeetxna,  
17 txãa pa'gately Piisxakuẽ jĩnisa jxkaahna ũsni  
ksxavxyste ũsa' txajx jxpe'jni yuutxna. Sa'  
yu' багаçxte yuhwa pçuwa'jmeesa's yusni yu-  
utxna. Aça' Dxusíi txãawe'sx ũ'neni yafx yu'txi's  
khukhuna jĩ'k.

## 8

*Selxo sietetewe'sxa's sudeni*

<sup>1</sup> Txajũ' txãa Piisxakuẽ j̄nisa' vxite selxo's sudek sietetewe'sxna. Naapkaçxha' cielute k̄ih yuhwa susm̄ee sxuuna'k yuu, media ora ãhpkaçx. <sup>2</sup> Txã'wẽ yũuni skhẽwniijũ' siete angeleswe'sxtxi uythu Dxus tasxte yujuçxa ũste, aça' txãawe'sxtxi'sa' jxukaysatx tukani trompeta ũsnitx yuu. <sup>3</sup> Txã'wẽ yuuçpkaçxha' Dxus angel vxite kũjk vxyuu bee kopa's atçxa, sa' altal tasxtek yuju. Aça' seena' wala ũsni yuuk txãa vxyuu bee kopate abçxa kabwa'ja's. Txãa yu'sa' vxyuu bee altal ũsu'k jxkaahna ũsni tasxte kxtee kabwa'kh yuu, Dxus luuçx jxukaysawe'sx Dxus yakh puutx we'weçpkaçxha' kabkahn. <sup>4</sup> Aça' Dxus angel txã'wẽ kabte', txãa ah yu' Dxus tasxte pa'kh tejka, Dxus luuçx jxukaysawe'sx Dxus yakh puutx we'weni yã'jçxa. <sup>5</sup> Txajũ' txãa Dxus angela' txãa vxyuu bee kopate utak çxhã'çxha ipx ji'phsa's ãsx kxtee altal-tewe'sxna, sa' txã'wẽ yũuçxak kiwe kajkwesu ãesu yahta. Aça' txã'wẽ yuuçpkaçxha', kpi'sx seena' kwehnena sus we'wena, ehdwa txã'wẽk seena' u'j.

*Siete angeleswe'sx trompetatx tujkaya' yujuni*

<sup>6</sup> Txajũ' txãa siete angeleswe'sxa' trompetatx tujkaya' yujutx.

<sup>7</sup> Aça' Dxus angel nyafxtewe'sxa' txajx trompeta's tujkak, naapkaçxha' naa kiwete kwetuba ãsxku ee ka'dnisa vxite' ipx yã'jçxa. Aça' naa kiwe pxãhn ãatuwku çxhavxy, yu'khwa txã'wẽy jxuka.

<sup>8</sup> Txajũ' Dxus angel e'ztewe'sxwa txajx trompeta's tujkak, naapkaçxha' thã'j vxiç wala na'wësa ipxçxaçxáak behna ũsu' txã'snak marte akhni yuu. Txã'wë yuute', mara' pxãhn âatuwku eeçxaçxáa yuu. <sup>9</sup> Aça' kxtee kihçxah ne'ta ãtxãsa ũsu' txãa yu' jxuka uutx mar eeçxaçxáa yuunisatewe'sx yu'. Aça' barkowa pxãhn âatuwtxi vxitu.

<sup>10</sup> Txajũ' Dxus angel tekhtewe'sxwa txajx trompeta's tujkak, naapkaçxha' cieluju teeçx estrelxa seena' walasa wetek ipxçxaçxáa behna. Yu'walasu vxite' yu'le'çxkuësuwa naa kiwete pxãhn âatuwku pëethehna wete. <sup>11</sup> Txãa estrelxa' Seena' Yaasak yaase yu', aça' naa kiwete pxãhn âatuwtxi yu'a' yaasaçxaçxáa yuu. Aça' nasa' seena' wala uutx, txã'wë yu' yaasaçxaçxáa yuupa'ga tudxya' ãjãmeeçxa.

<sup>12</sup> Txajũ' Dxus angel pahztewe'sxwa txajx trompeta's tujkak, naapkaçxha' sekwa puupxãhn âatuwku kweethmëe neeyũu. Aça' a'te, estrelxawa txã'wëyçxáatx puupxãhn âatuw kweethmëe neeyũu. Aça' txãa suwenisa yu' kweethmeeta'. Aça' en yu' wejkuë yuuçxáak khikhyna neeyũu, naapkaçxha' kus yu' jweeíçxáak seena' çxhi'dxsa yuu.

<sup>13</sup> Txajũ' thegçxa' uythu Dxus angel cielusu fxuhna u'jweçte seena' sus we'wena na'jãna:

—Dxus angel tekhsawe'sx trompeta's tukani susuçpkaçxha', seena' yuh ũukhũukhsa yuuna naa kiwete ũssa yakha' jĩ'k.

## 9

<sup>1</sup> Txajũ' Dxus angel tahçtewe'sxwa txajx

trompeta's tujkak, naapkaçxha' uythu cieluju estrelxa naa kiwete weteçte. Aça' txâa wetesa estrelxa's lxavxi's ũsniç yuu, kafx seena' dxiisatewe'sxna. <sup>2</sup> Txajũ' txâa kafx seena' dxiisa's phadek, naapkaçxha' orno walate ah na'wêk kaseh, sa' txâa aja' jxuka nuyçxhi'dxku sekna vxite' êesu jxuka. <sup>3</sup> Txâa ahte yu' khâ'sxtxi kaseh naa kiwete jxuka fxuhna. Aça' txâa khâ'sx yu' yâjaya' âjâwa'jsatx yu', usmitx ma'wêta aka yâja' txâ'wê. <sup>4</sup> Nawa naa kiwete fxtũ tasx, jxũth tasx çêysa yu'sa' kîh yuhnawa suwwa'jsameetx yu', naasâa Dxus selxo's dxikthesu maa yuhwa ji'phmeesaçxaçxá'stxi yâjawa'jsa yu'. <sup>5</sup> Nawa nasatx ikhwa'jsa yu' yu'çmeeta', naasâa tahç a'te âhpkaçx seena' wala kaaka'jwa'jsaçxáatx yu'. Sa' txâa akasa yu' usmitx yâjani na'wê seena' aka yuuwa'jsatx yu'. <sup>6</sup> Txâa ensu' nasa' uuwaja's pakweçxawa, uymeetxna. Makwe uuwaja's pakwetewa, txâawe'sxtxi' uu en pa'jmeena.

<sup>7</sup> Txâa khâ'sxa' jibatx gweçxate puiiya' u'jweççxa pheu'jnisa na'wêtx yu'. Dxikthesu yu' vxyuu bee korona na'wêsatx ji'phu', sa' dxi'pa' nasaa dxi'p na'wêtx yu'. <sup>8</sup> U'y na'wêtx ya'iidxkhas yu', sa' txâawe'sx ki'tha' león ki'th na'wêsatx ji'phu'. <sup>9</sup> Txâawe'sx kakwe yu' çam na'wêsaçxaçxá'stxi ya'iiphuph yu', sa' txâawe'sx fxujaçte susni yu' kaçxetilxa jiba wezxnisa kuhsa u'jweççxa ma'wê susukx txâ'wêtx susu'. <sup>10</sup> Sa' txâawe'sx mez yu' usmitx mez na'wêtx yâjawa'j ji'phu', nasatx yâjaçxa tahç a'te uta kaaka'jwa'jsa. <sup>11</sup> Txâa khâ'sxa' teeçx ne'jwe'sx ji'phu'tx, kafx seena' dxiite ũssa.

Txãa ne'jwe'sxa' hebreo yuwete yu' Abadonku yaase yu', sa' griego yuwete' Apolionku yaase yu' meeçxawa Ivxiitusa j̄nisa.

<sup>12</sup> Txajũ' Juan we'weçxa':

—Nyafxte seena' ũukhũukhsa yu' skhẽwku, nawa e'z̄i peejxta' j̄i'k.

<sup>13</sup> Txajũ' Dxus angel seistewe'sxwa txajx trompeta's tujkak, naapkaçxha' Dxus tasxte vxyuu bee altal pahz vxiçsu we'weni pthũusek.

<sup>14</sup> Sa' Dxus angel seistewe'sx trompeta ji'phu'k txã'sa' na'j̄inak jxkaahni yuu:

—Pahz angeleswe'sx tudni ũsta' Eufxrates yu'wala pukate txãawe'sxtxi' mitxhwete j̄ina.

<sup>15</sup> Txajũ' txãa angeleswe'sxtxi'sa' txhwetenitx yuu, nasa naa kiwetewe'sxtxi puupxãhn āatuw ikhkahn. Txã'wẽ yũuwa'jsa ne'ta pheu'jni ũsu', k̄ih ora, maa ente, k̄ih a'te, maa anxute txã'wẽ yuuwa'jsaçxawa txãa en āhtewe'sx. <sup>16</sup> Txajũ' txãa jiba seena'su a'jsatx jiyuth. Txãawe'sxa' seena' wala kuh yu'tx, dos cientos milxones.

<sup>17</sup> Na'wẽ jiba seena'satx uythu, aç'a' txãa jibate a'jsa yu' puiiwa'j txãawe'sx peçxusu ya'phuphnisa ji'phu'tx tekh jwed, teeçxsa' beh, vxite' çẽy, vxite' lemsa. Aç'a' jiba yu' león na'wẽtx ya'iidxiktheh yu', sa' yuwesu yu' ipx vxite' ah vxite' asufxre txã'wẽsatx kasehna ũsu'. <sup>18</sup> Aç'a' naa kiwete nasa puupxãhn āatuwtxi uu, txã'wẽ jiba yuwesu tekh jwed kasehçxa ikhpa'ga. <sup>19</sup> Txãa jiba' yuweju vxite' mezuhtx ewmée yũuwa'ja's ji'phu'. Txãawe'sx meza' ul na'wẽtx yu' dxikthé ji'ph, txãasatx txãaju ikhya' ājã'.

<sup>20</sup> Nawa txãa ewmeesa vxyaatx txãate uusaamée nasa yu' txãawe'sx ewmée yũuna

fxi'zeni's nvxihtmeeta'. Eçxthê'j jxkaahni'swa peçxkanamée nwēese'jna nestxi yu'. Sa' vxyuu beh, vxyuu çxihme, çam, kwet, fxtū, txāatxtxi nasa na'wē piisaçxa neewe'wena nes yu'. Txāa piisanisa' uysaawameeta', sa' wēse'jsawameeta', u'juya'wa āja'çmeeta'. <sup>21</sup> Sa' ikhna fxi'zeni'swa nvxihtmeeta', sa' dxijxuuna, kazx pkal yuuna, pesweena txā'wē yūunisatxwa nvxihtmeeta'.

## 10

### *Dxus angel kusete libru ji'phsa*

<sup>1</sup> Txajū' Dxus angel vxite uythu seena' çxhāçxhasa cieluju tâaph pxāhte kījaçte, sa' dxikthete yu' kxthūusku ji'phu'. Txajx dxi'pa' sek na'wēk kweethe', sa' txajx çxida yu' ipx na'wēçxaçxāatx yu'. <sup>2</sup> Kusete yu' libru le'çxkwesa'sku phadeçxa ji'phu', sa' paçu çxidaju yu' martek yuju, sa' jebu çxidaju' kiwetek yuju. <sup>3</sup> Txā'wē yūuçxak sus we'we león pebeeçxa ma'wē sus seena' pebeekx txā'wē. Sa' txā'wē seena' pebeeçpkaçxha', siete kpi'sx we'wenik pthūuse. <sup>4</sup> Txā'wē siete kpi'sx we'weni's jiyuçxa', fxi'jya'wath yu'. Nawa cielujū na'jīna we'weni'sthu wēse'j:

—Txāa siete kpi'sx we'wenitx jiyug txāatxi's kim yuhtxwa pta'sxna fxi'jnu jī'k.

<sup>5</sup> Txajū' txāa Dxus angel marte vxite' kiwete yujuçxa ūssa' paçu kuse's cielute kiisçxa <sup>6</sup> jurāyku bagaçxte yuhwa uumée itxī fxi'zewa'jsa na'wē kījkīhtxwa jxuka vxitku txajx yase's kxsusçxa na'jīna:



—Ăçxha' jwee yu' jxthēeyuumeena. <sup>7</sup> Dxus angel sietetewe'sx txajx trompeta's tujkaya' takheçpkaçxha', nmeh ente ma'wē yūuwa'ja's ne' Dxusa' pheu'jçxa ji'phu' txā' jxuka kxtey yuuna. Sa' Dxus yuwe's pta'sxna selpisaawe'sxtxi ma'wēne' pta'sx txāa yu' jxuka kxtey yuuna jĭk.

<sup>8</sup> Cielujū we'weçxa' eçte kuçx fxi'jnu jĭk txā' ki' we'wek adx yakh na'jĭna:

—Dxus angel na'wē paçu çxida's marte tx-ahçxa vxite çxida's kiwete txahçxa ūssa' kusete libru' ji'pha' txāa libru's jxpa'gaya' me'j jĭte', <sup>9</sup> Dxus angel tasxte utxaaçxa txāa libru's pējxthu. Aça' na'jĭnak pta'sx:

—Jxpa'gaçxa mē'. Nawa iidx yuwete yu' mil na'wē nxusxa pēethejena, naapkaçxha' iidx tutxhte yu', wala seena' yajana jĭ'k.

<sup>10</sup> Txajū' Dxus angel kuseju jxpa'gaçxa libru's ū'th, aça' adx yuwete yu' mil na'wēk nxusxa pēetheeh, nawa adx tutxhte yu' seena' wala yaak. <sup>11</sup> Txajū' na'jĭnak jxkaah adxa's:

—Na'wē Dxus kaajiyu'kh txā'sa' pta'sxya' ki' u'jwene'ga, çxhaab iisa, nasa msuuwe'sxwa, fxiyfxiy we'wesa, jxkaahsawe'sx txā'wēsax jĭ'k.

## 11

### *E'z piçthē'j Dxus yuwe's pta'sxya' kaahnisa*

<sup>1</sup> Txajū' isani khĭh ūççxa na'wēk jxkaah:

—Dxuus yat vxite' altal txāa makwetewa jiyuya' miisa, sa' Dxusna neewe'weya' kxtee u'kasa maazkuēetewa jiyuya' miisa. <sup>2</sup> Nawa Dxus yatte patxu ekajuwe'sx yu'sa' isanu. Txā'wēme' txajuwe'sxa's vxite nasatxku ūsni

yuu, aça' txãawe'sxa' jxuka suwuutxna Dxus çxhab atesa's kuarenta y dos a'te âhpkaçx. <sup>3</sup> Naapkaçxha' adxna selpisáa e'z kaja'nja, adx yuwe's mil doscientos sesenta en âhpkaçx pta'sxna ũskahn. Txãawe'sxa' nasa uute nxusna athnisa ropa khũçxsa ji'ph yuutxna.

<sup>4</sup> Txãa e'zsawe'sxa' e'z oliwo fxtũ tasx ũsu'tx txã'wēsata', vxite' bela txaahni e'z ũsu'tx naa kiwete Dxus tasxte txã'wēsaiçxáata'.

<sup>5</sup> Txãawe'sxtxi' maai' yu' pkxuu wējēwáatxna, nawa txãawe'sx yuwesu ipx kasehçxa jxuka kabuna açesawe'sxtxi's. Aça' txã'wē yūute', maawa pkxuu wēesa' uu en ji'phutxna. <sup>6</sup> Aça' txãa selpisaawe'sxa' cielu's aphy'a' âjāwa'jsata', Dxus yuwe's pta'sxwa'j en pçuupkaçx nus pa'khamen. Sa' yu'a'swa eeçxaçxáa vxit-ya' âjāçxa seena' wala kxūusu'jwa'jsata' naa kiwete kīh weewa nuypa'jna, txãawe'sxtxi ma'wē yūuweçxtewa txã'wē yūutxna. <sup>7</sup> Nawa txãawe'sx mjīia's jxã'jaçpkaçxha', eçx iiméh seena'sa kafx seena' dxijjũ kãhçxa txãawe'sxtxi puiiçxa knayçxa ikhena. <sup>8</sup> Txãawe'sx uuníi kakwe's na'wē kwe'sxtxi jxpe'jsa kluuste uuk txãa çxhab wala klxiikhunsu wãataani yuutxna. Txãa çxhaba's Sodoma vxite' Egipto na'wēsa' ji'tx. <sup>9</sup> Aça' tekh en eēpxāh âhpkaçx nasa maa çxhabuwe'sx, ma'wēsa fxiyfyiy we'wesa, maa kiwejuwe'sxwa jxukasa txãa uuníi kakwetxi's uyuutxna, nawa kaapeda'j yu' meetxna. <sup>10</sup> Txajũ' nasa naa kiwetewe'sxa' seena' wala weçxaatxna txã'wē uupa'ga, sa' txã'wē weçxaweete txãawe'sx ji'phuni's puutx peesutxna. Txãawe'sx yakh yu' iiméh seena'

wala ewmeesa na'wēsa yuutxna txāa e'z piçthē'jsa Dxus yuwe's pta'sxna ũssawe'sxa', txāa pa'ga uute' wala weçxaatxna. <sup>11</sup> Nawa uuníi tekx en ēepxāh skhēwnijū', Dxusa' itxí vxitku aça' ki' kiitetx. Txā'wē yūute', iiméh seena' wala ũukhtxi jxukaysa uyna ũssawe'sxa'. <sup>12</sup> Txajū' txāa e'z selpisaawe'sxa' wēse'jtx seena' sus we'weni cielujū na'jīna:

—Ayte cielute ēete myuhwe jīçpkaçxha', tãaph pxāhte u'jçxa cielute tejkatx, txāawe'sxtxi açesawe'sx uyna ũste. <sup>13</sup> Txā'wē yuuçpkaçxha', seena' wala ehd u'jçxa txāa çxhaba's ma'wē yu' suwçxa ejx jxūna u'kh, aça' siete mil nasatx uu txāa ehd u'pha'ga. Txā'wē yūute', nasa neeyūusa' iiméh seena' wala ũukhçxa Dxus cielute ũssa's pthaa we'wena tuuthe'jtx.

<sup>14</sup> Txajū' Juan we'weçxa': Seena' ũukhūukhsa e'ztewe'sx yu' skhēwku, nawa jxthēeyuumeena tekhtewe'sxwa jī'k.

### *Trompeta sietetewe'sx*

<sup>15</sup> Txajū' Dxus angel sietetewe'sxwa txajx trompeta's tujkak, aça' seena' sus we'wenisa pthūuse'tx cielujū na'jīna:

Naa kiwete jxkaahna ũsnisa' jxuka kwe'sx Tata vxite' txajx Txhitxhnisa Kristo txāawe'sx jīiçxaçxáatx yuuna pa'j.

Aça' āçxha' txāaçxaçxáa jxkaajana bagaçxtewa jīnatx we'we.

<sup>16</sup> Txajū' Dxus luuçxtxi jxkaahsa weintikua-trosawe'sx Dxus jxkaahna ũsnite ũssa' kiwete kīiçhuçxa Dxusa's neewe'wetx na'jīna:

17 Kwe'sxtxi jxpe'jsa idxa's weçxa'tha'w, Dxus iiméh seena' walasag.

Idxa' nyafxíiwa idxíiçxáag yu', sa' ãçxwa txãáiçxáag, sa' bagaçxtewa idx yuuçxáa nes yuuwa'jsag.

Txãa pa'gatey kíhtewa jxuka ãjãwa'ja's idxçxaçxáa ji'phgu,

Txãasa ãçxha' jxkaahna ũsgu.

18 Naa kiwete nasa' idxa's ahçetx, nawa txãawe'sxtxi kastigãywa'j ena' ãjk.

Aça' txã'wëy uusaawe'sxtxiwa kastigaïne'ga.

Sa' walasa ma'tx yuu meeçxa' le'çxkwesa ma'tx yuu nawa idx yakh txutemée fxi'zeçxa iidx yase's açewe'wesameewe'sxtxi' de-weene'ga ew yũuna iidx yuwe's pta'sxna selpiina fxi'zepa'ga.

Naapkaçxha' naa kiwete suwna ũssawe'sxtxi's ka'tu' ivxiitune'ga jĩnatx we'we.

19 Txajũ' cielute Dxus ũsni phatek, aç'a' na'wë Dxusa' nasa yakh puutx we'wek txãa puutx we'weni's fxi'jçxa kajate jxaawni yuuk txãa kaja' vxyaak. Naapkaçxha' kpi'sx kwehneçxa seena' susku kwetuba seena' wala ãsxna, aç'a' ehdwa u'kh.

## 12

### *U'ya's eçx seena'sa ikh wëeni*

<sup>1</sup> Txajũ' ãe walaju na'wëk seena'sa vxyaa: teeçx u'y txajx kakwete yu' sekçxaçxáa ji'phsa a'tete yujuçxak ũsu', sa' dxikthete yu' teeçx korona doce estrelxa ji'phsa'sku ji'phu'. <sup>2</sup> Txãa

u'ya' nasatek ãçã'aç yu', sa' seena' wala pxthaa yakana pebe'k.

<sup>3</sup> Txãa e'su' ãe walaju ki' vxite na'wëk vxyaa: eçx behsa iiméh seena'sa siete dxikthé ji'phsa, diez kaaçxuk ji'phu', sa' dxikthé iisa teeçx koronak ji'phu'. <sup>4</sup> Txajx mezu yu' estrelxatx pu-upxãhn áatuwku suwçxa naa kiwekhë pũsx. Sa' txãa eçx seena'sa yu' u'y nasa kasejxa' ũsu'k txãa yaçtek ũyhasna yuju, nasa kasejeçpkaçxha' luuçxa's ũ'ya'. <sup>5</sup> Txajũ' txãa u'ya' teeçx luuçx pihçku ji'phu, txãak naa kiwete jxuka jxkaahwa'jsa yu' iiméh wala juuna'. Txajũ' txãa luuçxa's kusa'jçxa, Dxus jxkaahna ũsnitek jxũna u'jni yuu. <sup>6</sup> Aça' txãa u'ya' nasa u'pnimée kiwetek ũphna u'j, txãa jïi Dxus pheu'jçxa ji'phune' kxtee ũsya'. Kxtee pa'the', mil doscientos sesenta en áhpkaçx sãjïni ũswa'jsa'.

<sup>7</sup> Txãa e'su' cielute puiiwa'kh u'pu', aça' Dxus angel npiiçthë'jsa Migwela' txajx angeswe'sx yakh puiitx eçx seena'sa yakh. Aça' eçx seena'sawa txãa yakh ũssawe'sx yakh kasejk puiiya'. <sup>8</sup> Nawa eçxa' knayme', sa' txãawe'sxa' cielute ũswa'j ji'phmeetx neeyũ. <sup>9</sup> Txãa pa'ga eçx seena'sa's ekaju wãataanik yuu, txãaáik txãniitey ul jïnisa yu', naa kiwetewe'sx jxukaysatx ĩsxĩina kaypuba'jsa Eçxthë'kh yaase yu'. Txãa eçxthë'j vxite' txãa yakh ũssa jxukaysatx naa kiwekhë wãataanitx yuu.

<sup>10</sup> Txajũ' cieluju sus we'wena na'jïni'sthu wëse'j:

—Ewte neeyũuwa'j en pa'kh, kwe'sx Dxus txãaçaçxáa jxkaahwa'j en vxite' Dxus txhitxhnisa Kristowa txã'wëy jxkaahwa'j

en. Txãa pa'gatey kwe'sx yakthê'jwe'sxtxi ewmeesata' jîna pãatxhî'khna ùssa's ekaju wãataanik yuu, txãaík bagaçxtewa pu'vxitumée nes yu' kwe'sxtxi pãatxhî'khna. <sup>11</sup> Txã'wêtewa, kwe'sx yakthê'jwe'sxa' eçx ewmeesa's knaytxi, na'wê Piisxakuê jînisa ikhni uuk txajx eeju vxite' txajx kaapiya'jni's pu'vxitumée pta'sxna fxi'zepa'ga. Txãawe'sxa' Kristo's selpiipa'ga uu en pa'thewa txã'sa' nxusmée uuya'çxáatx ùsu'. <sup>12</sup> Txã'wê ewmeesa's knaypa'ga weçxweçxa miijajkxwe, cielute fxi'zesawe'sx jxuka. Nawa seena' yuh wala ùukhũukha' naa kiwete mteewe'sxwa jxukaysa yakha'. Txã'wê ùukhũukh yuukahní eçxthê'ja' í'kwe'sxtxi pkxuuya' kîjk seena' wala ùusaçxana, sa' kuh enmée ùswa'ja's jiia' txãasa txã'wê ùusaçxana ùsa'.

<sup>13</sup> Sa' txãa eçx seena'sa' kiwekhê wãataani yuuçxa', txãa u'y luuçx ji'phusa's ikhya' pakwek. <sup>14</sup> Nawa txãa u'ya's uuh wala fxu ku'ta na'wêsa's ùsniik yuu, eçx seena'sa' tasxu iyuna u'jçxa nasa u'pnimée kiwete txajx ùswa'the fxuhna u'khan, kxteea' tekh anxu pxãhtepkaçx sã'jînik fxi'zewa'jsa yu'. <sup>15</sup> Txajũ' txãa eçxa' yuwesuk yu' nuysêh, yu'a's seena' wala nuywalaaçxa txãa u'ya's yu' jxũna u'khan. <sup>16</sup> Nawa txãa eçx yuwesu yu'sêesa's kiwe' jxuka çxazxaçxa txãa u'ya's nwe'wek. <sup>17-18</sup> Txã'wê yũute', txãa eçx seena'sa' txãa u'ya's jweeíçxáak seena' wala ùusaçxa. Sa' txãa u'y ji'jwe'sx yakh puiiya'k u'j Dxus jxkaahnitxi's nwêese'jna Jesukristo kaapiya'jni's jxpubamée nwêese'jsawe'sx yakh.

# 13

## *E'z eçx seena' ûukhûukhsa*

<sup>1</sup> Txâa e'su' mar pukateth yujuçxa ũsu', sa' uythu eçx seena' kazx ûukhûukhsa mar pxâjũ kasejeçte, sa' siete dxikthé ji'phçxa diez kaaçxuk ji'phu', kaaçxu iisa teeçx koronak ji'phu'. Sa' txâa dxikthesu yu' Kristo's seena' kazx açewe'wenak fxi'jni yu'. <sup>2</sup> Txâa eçx seena' kazx ûukhûukhsa' txiklxi na'wêk jxkajkwe yu', çxida yu' oso na'wêtx yu', sa' yuwe yu' león na'wêk yu'. Aça' eçxthê'ja' txâa eçx seena' kazx ûukhûukhsa's kîh yũuya'wa âjâwa'ja's ũsçxa txajx jxkaahna ũsni'swa dukhku, sa' kîhtewa jxuka pu'çxya'k neeyũu. <sup>3</sup> Txâa eçx seena' kazx ûukhûukhsa dxikthé teeçxsa yu' uupçxâjk kpã'yuuni yu', nawa txâa kpã' yu' wêetniyã'kh yu', aça' naa kiwete nasa jxukaysa txâa eçx seena' kazx ûukhûukhsaçxá'stxi weçxana utxaaçxa neewe'we. <sup>4</sup> Sa' eçxthê'ja'swa weçxana neewe'wetx, txã'wê eçx seena' kazx ûukhûukhsa's jxkaahwa'jsa vxitçxa ki'ppa'ga. Sa' eçx seena' kazx ûukhûukhsa yu'sa' na'jînatx neewe'we':

—¿Kim naa na'wêy seena'sa ũski, sa' kim txâa yakh puiya' çxhâçxhakx? jî'tx.

<sup>5-6</sup> Sa' eçx seena' kazx ûukhûukhsa's kwe'we'jnik yuu, Dxusa's wêesxuuna açewe'wekahn. Aça' kxtey yuuçxa, Dxusa's wêesxuuçxa açewe'wena Dxus ũsni'swa açewe'wek, cielute ũssawe'sxtxiwa txã'wêyku açewe'we. Sa' txâak jxkaahwa'jsa yuu kuarenta y dos a'te âhpkaçx. <sup>7</sup> Sa' Dxus luuçxtxi ahçeçxa

gweçxa'swa vxit kaahnik yuu knaypkaçx. Txãasak naa kiwete jxukaysawe'sxtxi jxkaahwa'jsa yuu, nasa ma'wēsawa maa çxhabuwe'sxwa fxiyfxiy we'wesawa jxukaysatx. <sup>8</sup> Aça' na'wē Piixakuē jīnisa ikhni yuuk txā' libru ji'pha' bagaçxte yuhwa uuwa'jsamée yasetx fxi'jni, aça' naa kiwetewe'sx jxukaysa txāawe'sx yase's naa kiwe's vxitiynaçxāa yuhwa txāa librute fxi'jnimeesa' jxukaysa txāa eçx kazx ũukhũukhsa's neewe'wetx.

<sup>9</sup> Txāa ente' na'wē seena' yuutxna txā'sa' mwēese'jwe: <sup>10</sup> Nasatx preesu'jsa' txāawe'sxwa preesu'jni yuutxna. Aça' nasatx kçxilxuh ikhsa' txāawe'sxwa kçxilxuh ikhni yuutxna. Txāa pa'ga Dxus luuçxa' Dxus yakh yuuçxāa çxhāçxha fxi'zewa'ja's ji'phuwa'j peejxta'.

<sup>11</sup> Txāa e'su' vxite eçx seena' kazxsa kiwe dxiiñũ kãjaçte uythu. Txā' piixāa kaaçxu na'wēsa e'zku ji'phu', nawa txāa eçx seena' kazx ũukhũukhsa na'wēyku Kristo's açewe'we'. <sup>12</sup> Sa' eçx kazxsa nyafxtewe'sx na'wēy jxkaajxa' ājāwa'ja'sku ji'phu', txāasak naa kiwete nasa jxukaysatx jxkaaja', eçx na'wē dxikthete kpā' seena'sa ji'phuçxawa wēetku txā'sna neewe'wekahn. <sup>13</sup> Sa' kījkihwa seena'sa'swa kaavxya'ja'jya' ājā'k, cielujũ ipx wala seena'sa kaakīji'jna naa kiwete nasa uyna ũste. <sup>14</sup> Eçx kazxsa nyafxtewe'sx tasxte seena'sa's kaavxya'ja'jya' ājāçxa, naa kiwete nasa jxukaysatx kaypuba'kh Dxus yuwe pta'sxsa na'wē kihwa kaavxya'ja'jçxa. Sa' seena' dxikthete kpā' ji'phçxawa uumée çxhāçxhak txāa na'wēysa piisakaakh itxīmeesa. <sup>15</sup> Sa'



eçx kazxsa kiwe dxiiijũ kãasa' txãa piisanisa ãtxĩmeesa's ãtxĩ vxit-ya' ãjãwa'ja's ji'phu'k. Aça' txãa ãtxĩ vxitnisa's neewe'wesamée yuutxi'sa' kiwe dxiiijũ kãasa eçxa' kiikhe'jwa'jsak yu'. <sup>16</sup> Txajũ' eçx kiwe dxiiijũ kãasa' na'wêk yũu jxukaysatx: le'çxkwesa, walasa, ji'phsa, ji'phmeesa, patron ji'phsa, patron ji'phmeesa, teeçx yuhwa nvxihtmée jxukaysatx iisawa'khaakh paçu kusete meeçxawa dxi'pte. <sup>17</sup> Sa' txãa eçx kiwe dxiiijũ kãasa yaseju iisawa'jni's meeçxawa txãa yase numero's ji'phmeesa yu', kãh yuhwa weyya' ãjãmeetxna, sa' txweyya'wa ãjãmeetxna maa yuhwa. <sup>18</sup> Sa' txãa eçx kazxsa numero' kwe'sx jiyunisa'. Aça' txã'sa' jiyuwa'jsa ãsçxa', ãus miiyajkxwe: txãa numero' seiscientos sesenta y seisa'.

## 14

### *Ciento kuarenta y quatro mil nasa memniisa*

<sup>1</sup> Txãa e'su' uythu Piisxakuẽ jãnisa Sion thã'j vxiçte yujuçxa ãste. Txãa yakh vxite ãsu'tx, ciento kuarenta y quatro mil nasa, txãawe'sx dxikthesu yu' Piisxakuẽ jãnisa yase vxite' tx-ajx Tata yase's ji'phsa. <sup>2</sup> Txajũ' cielujũ susni pthũusek yu'wala kuhsa susni na'wê vxite' kpi'sx çxhãçxha we'weni na'wê susni, iiméh wala kuhsa txãawe'sx arpa tukani na'wêk pthũuse'. <sup>3</sup> Txãa nasa' mem u'sesatx memu', Dxus jxkaahna ãsni vxite' Dxus vxitni ãtxãsa pahzsawe'sx vxite' Dxus luuçtxxi jxkaahsawe'sx txãawe'sx tasxte. Txã'sa' kim yuhwa piyaya' ãja'çmeeta', naasãa naa kiwetewe'sx ksxavxyu

ewte neeyũusáa ciento kuarenta y kuarto mil txãawe'sx yuuçxáatx ãjã'. <sup>4</sup> Txãawe'sxa' Dxus yuuçxáana selpiina fxi'zesatx yu', sa' txãawe'sxa' nasaa ksxavxyu nwe'wenitx yuu Dxus jii vxite' Piisxakuẽ jĩnisa txãa jii yu-uwa'jsa, nyafxte nwe'wenisa. Txãasatx Piisxakuẽ jĩnisa ikhni yuuk txãa mtee u'thewa txãa yakh ja'da u'jwe'. <sup>5</sup> Sa' kĩhçxáa yuhwa ixsĩisa yu'çmeeta', sa' Dxus jxkaahna ũsnite kĩh pkal yuhwa ji'phmée ũsta'.

*Dxus angeswe'sx tekhsa pta'sxya' kasehni*

<sup>6</sup> Txajũ' Dxus angel fxuhna u'jweçteth uy ãe walasu. Sa' ewte neeyũunisa bagaçxte yuhwa pçuwa'jsame's pta'sxwa'ja'sku ji'phu' naa kiwetewe'sx mtee mteewe'sxtxiwa, nasa ma'wẽsa, fxiyfxiyçxáa we'wesa, maa çxhabsuwe'sxtxiwa jxuka. <sup>7</sup> Sa' na'jĩnak sus we'we':

—Dxusa's mtuuthe'jwe ũukhna. Txã'wẽme' jxukaysatx kastigãywa'j ena' ãjxã'kh. Mneewe'wewe cielu, kiwe, mar, yu', kĩjkĩhnawa jxuka vxit-sa's jĩ'k.

<sup>8</sup> Txajũ' Dxus angel vxite na'jĩnak sus we'we:

—Babilonia çxhab txakwe çxhãçxhasaçxawa, Dxus kastigo's jxpa'gawa'the yã'j ũsa'. Txã'wẽ yuukahnii naa kiwete nasa mteewe'sxtxiwa jxukaysa pkal kazxte fxi'zewa'ja'sku kaapiya'j naa pa'ga jĩ'k.

<sup>9</sup> Txajũ' Dxus angel tekhtewe'sxku na'jĩna sus we'we:

—Maawa eçx seena'sa vxite' txãa na'wẽy piisani yuuk txãatx neewe'weçxa, txajx iisawa'jni's kaaki'pu'juna dxi'pte meeçxawa kusete na',

<sup>10</sup> txã'wě yūusa' Dxus kastigo seena' nxussa's jxpa'gatxna txã'wě yūupa'ga. Sa' seena' yuh kastigãyni yuuna asufxre ipx walate, Dxus angeleswe'sx vxite' Piisxakuē jīnisa ikhni yuuk txāawe'sx dxi'pte. <sup>11</sup> Kastigãyni ipx wala aja' bagaçxte yuhwa pçumée sxi'tana nes yuuna. Aça' kxteea' en ma'k yuu kus ma'k yuu nawa bagaçxte yuhwa jxkaasewa'ja's ji'phumeetxna, txã'wě eçx seena'sa vxite' txāa na'wēy piisani yuuk txāatx neewe'weçxa txajx yaseju iisawa'jni's kaaki'pu'pha'ga. <sup>12</sup> Txāa pa'ga Dxus luuçxa' txajx jxkaahni's kxtey nwēese'jna Jesus yakh yuuçxáa çxhãçxha fxi'zewa'ja's ji'phuwa'j peejxta' jī'k.

<sup>13</sup> Txajū' ki' wēse'th we'weni cielujūwe'sx, txã' adxa's na'jī'k:

—Naa skhēwniijū Kristo's jxpa'gaçxa uusaawe'sxa' wala yuh wētwe't fxi'zesa yuutxna jīni's mfxi'j jīte', Dxus Espiritu pasçxa': Txã'wě yuja', txāawe'sxa' jxkaaseetxna Dxusna selpiina pxthaa yuuna fxi'zenijū, sa' cielute uyuutxna txāawe'sx mjīni's jī'k.

### *Skuutxh uwatx pkhakhni*

<sup>14</sup> Txajū' thegçxa uythu tāaph çxihme kajkwete nasa yuusáa na'wēsak teeçx kaçxçxa u'pu'. Dxi-thete vxyuu bee koronak ji'phu', sa' kusete yu' skuutxh wakani zeksa'sku ji'phu'. <sup>15</sup> Cielute Dxus ūsnijū vxite angel sus we'wena kasejk tāaphte kaçxçxa u'psa's na'jīna:

—Skuutxha's wakaçxa mepkhakh. Txã'wēme' jxuka thē'kh aça' pkhakhwa'j en ājk jīte',

<sup>16</sup> tãaphte kaçxçxa u'psa' naa kiwete skuutxha's wakaçxa jxuka pkhakhku.

<sup>17</sup> Txajũ' cielute Dxus ũsnijũ vxite angelwa kasejk uwa udeni zeksa's atçxa. <sup>18</sup> Naapkaçxha' Dxus altaluh vxite angel kasejk txã' ipxa's kaahwa'jsak yu'. Sa' uwa udenisa's ji'phsa's na'jĩnak sus we'we:

—Uwa's uhdeçxa mepkhakh. Txã'wẽme' jxuka thẽ'jni yã'j ũsta' naa kiwete jĩte', <sup>19</sup> Dxus angela' naa kiwete uwa's jxuka uhdeçxa pkhakhku, sa' teeçx ahteçxaçxáak jxuka âsx kxtee ku'sya'. Txãa yu' Dxus kastigo' na'wẽ seena' yuuwa'jsa' jĩnisak yu'. <sup>20</sup> Txãa uwatxi's çxhab ekajk ku'sni yuu, aça' eeçxaçxáak uwu jiba fxrenusu kãhpkaçx, tres cientos kilómetro peeku'jsu pkaçxku txã'wẽ uta.

## 15

### *Dxus aneleswe'sx siete kastigotx ji'phsa*

<sup>1</sup> Vxite seena' ũukhũukhsa cielute uythu: siete aneleswe'sxa' siete kastigo's pta'sxsatx yu'. Txãa siete kastigosa' nmehsatx yu' Dxus kastigo.

<sup>2</sup> Mar ipx ka'dni na'wẽsa zhiçxkwe speeju na'wẽ khikhyna ũste uythu. Aça' eçx seena'sa vxite' txãa eçx na'wẽy piisani yuuk vxite' txajx yase numero txã'wẽsatx nwẽese'jsameewe'sx yu' txãa mar pukate yujuçxatx ũsu', tukani arpatx Dxus ũsku txãatx atçxa. <sup>3</sup> Sa' Dxusna selpisáa Moises mema's memu'tx, vxite' Piisx-akuẽ jĩnisa'swa weçxana memu'tx na'jĩna:

Dxus, kĩhtewa jxuka ãjãsa,

Seena' yuh wala pu'çxgu kĩhtewa jxuka.

Naa kiwete jxuka jxkaahsa iidx mjĩini' jxuka ewçxaçxáata'.

<sup>4</sup> Kwe'sxtxi jxkaahsag aça' çidxa's kim ũukhmée yuukx?

Sa' çkim idxa's tuuthe'jmée yuukx?

Idx yuuçxáa pkal ji'phmée atesag, aça' maa kiwejuwe'sxwa jxuka idxçxaçxá's neewe'wetxna,

Txãa pa'gately idx ew yũunisa' ãatek yuu jĩnatx memu'.

<sup>5</sup> Txã'wě yũunijũ' ki' vxite uythu, cielute Dxus ũsnite Dxus leytxi jxaawni vxitx phateeçte.

<sup>6</sup> Aça' txãa Dxus ũsnijũ yu' siete angeleswe'sxtxi kaseh, siete kastigo seena'satx jxũçxa. Txãawe'sxa' athni ropa ate kwentetesatx ji'phu'. Sa' jxtudnisa yu' vxyuu behçxaçxáa peçxun kãhsatx ji'phu'.

<sup>7</sup> Txajũ' Dxus vxitni itxĩsa pahzsatewe'sx teeçxsa' vxyuu bee kopa ũsku teeçxsa na'wěçxah txãa siete angeleswe'sxtxi. Kxtee yu' kastigo seena'saçxaçxáa utatx ji'ph yu' Dxus bagaçxtewa nes yuuwa'jsa kaahni.

<sup>8</sup> Aça' txãa Dxus ũsnite yu' jxuka ahçxaçxáa utak, Dxus kĩhtewa jxuka ãjãwa'jsa tasxu yuusak yu'. Aça' kxtee yu' kim yuhwa u'kaya' ãjãçmeeta', siete kastigo siete angeleswe'sx ji'phu'tx txãa pçumeyna yu'.

## 16

### *Siete kopa Dxus kastigo's ji'phsa*

<sup>1</sup> Txajũ' siete angeleswe'sxtxi na'jĩna sus we'weni wěse'th Dxus ũsnijũ:

—Dxus kaahni kastigo seena'satx siete kopate ji'phi'kwe txãatx me'jwe pkawya' kiwete

jīte', <sup>2</sup> Dxus angel nyafxtewe'sxa' u'jçxa txãa kopatewe'sxa's kiwete pkawku. Aça' txã'wē yūute', nasa jxukaysa eçx seena' kazxxsa vxite' txãa eçx na'wēy piisani yuuk txãatx neewe'wesawe'sxtxi's kakwete wã'jy seena' akasa pa'kh.

<sup>3</sup> Dxus angel e'stewe'sxa' txãa kopatewe'sxa's martek aw, aça' txãa mara' nasaa ee na'wēçxaçxáak yuu jxuka. Txã'wē yūute', txãa marte ũssa ãtxĩsa jxuka uutx.

<sup>4</sup> Txajū' Dxus angel tekhtewe'sxa' txãa kopatewe'sxa's yu'walasu vxite' yu'le'çxkuēsu kxsūuk aw, aça' yu' ma'wēsawa jxuka eeçxaçxáatx yuu. <sup>5</sup> Txajū' Dxus angel yu'a's thegsa' na'jĩna we'weni'sthu wēse'j: Dxus, nyafxĩwa idxgu yu' sa' āçxwa txãaĩçxáag, Dxus atesa. Txãasag txã'wē kastigaĩ'. <sup>6</sup> Iidx yuwe's pta'sxpa'ga ahçeçxa idx yakh fxi'zesawe'sxtxi ee pkawtxi, txãa pa'gag txã'wē yūusatxi's ka'tuwa ee yusu'. Txãawe'sxa' kastigo's jxpa'gawa'j ji'ph yuhta' jĩ'k.

<sup>7</sup> Naapkaçxha' Dxus altaluh na'jĩna vxite we'weni'swa wēse'th:

—Dxus kĩhtewa jxuka ājãsa idxa' peekxçxáa kastigaĩmēe, isag kastigaĩ' jĩnik pthūuse.

<sup>8</sup> Txajū' Dxus angel pahztewe'sxa' txãa kopatewe'sxa's sektek aw. Txã'wē yūute', seka' nasatx iiméh wala açxa kweethkahnku txã'wē yuu. <sup>9</sup> Aça' jxukaysa iiméh seena' wala çxhavxytxi. Nawa pkala's nvxihtçxa Dxus tasxte yu' sxawedmeeta' txã'sna neewe'weya'. Txã'wē Dxusna yaakipkaçxte, jweeĩçxáatx txã'sna açewe'we' txã'wē seena' kastigãyya' ājãsa's.

10 Txajũ' Dxus angel tahçtewe'sxa' txãa kopatewe'sxa's eçx seena' kazx ùukhũukhsa jxkaahna ùsnitek aw, açã' txãa jxkaahna ùsni kiwe' çxhi'dxteçxáak yuu. Txã'wẽ seena' yuute', nasa' ùusçxaniite thune's ya'wa'ki'tx kastigo tx-akwe seena'sa pa'pha'ga. 11 Makwe txã'wẽ yu-utewa, txãawe'sx ewmée yũuna fxi'zeni yu'sa' weh yuhwa ivxiitu'çmeeta'. Txã'wẽ wã'jy seena' akasa pa'thewa, jweeíçxáatx cielute Dxusa's açewe'we'.

12 Txajũ' Dxus angel seistewe'sxa' txãa kopatewe'sxa's Eufxrates yu'walatek aw. Açã' txã'wẽ yũute', txãa yu'wala' uhdxku jxkaahsawe'sx sek kãani ju'gu yuusa uykhẽwya' ãjãkahn.

13 Txajũ' na'wẽsath vxite uy: Eçxthẽ'j yuwejũ vxite' eçx seena' kazxsa Kristo's açewe'wesa yuwejũ vxite' eçx kazxsa Dxus yuwe pta'sxsa na'wẽ kĩhwa kaavxya'ja'jçxa kaypuba'jsa yuwejũ tekh eçtxxi kaseh sap na'wẽsa. 14-16 Txãa eçx sap na'wẽsa yu' kījĩhwa seena'satx kaavxya'ja'jya' ãjã'tx, sa' txãawe'sxa' naa kiwete jxkaahsa jxukaysatx pkhakhya' u'jtx, nmeh ente Dxus txakwe çxhãçxhasa yakh puiiya' sũhçxa. Sa' jxkaahsawe'sx jxukaysatx pkhakhtxi hebreo yuwete Armagedón jĩ'tx teeçx ahte kxtee. Kristo we'weçxa': Yajkxmée ùsiyna, peswée na'wẽçxáa pa'ja'nja, açã' txãa ente thaamena ùsya'mée, Dxus yakh txutemée fxi'zesa' wala yuh wẽtwẽt neeyũutxna jĩ'k.

17 Txajũ' Dxus angel sietetewe'sxa' txãa kopatewe'sxa's ãesuk pkaw, naapkaçxha' Dxus

ũsni cielujũ na'jĩnisak sus we'weni pthũuse txajx jxkaahna ũsnijũ:

—Na' Dxus kastigo nmehtewe'sxa' jĩ'k.

<sup>18</sup> Txajũ' kpi'sx kwehnena we'weni seena' susku, aça' ehd iiméh seena' çxhãçxha u'kh, naa kiwe yuuiyna bagaçxte yuhwa txã'wẽ yu' ehd çxhãçxha u'jweçmeene'. <sup>19</sup> Txã'wẽ ehd u'pha'ga naa kiwete çxhab jxuka pçuutx. Aça' çxhab iiméh seena' walasawa tekh ahsutx upe. Aça' Dxusa' yajkxku Babilonia çxhab wala's jxukate kastigãyya', seena' ewmée yũupa'ga. <sup>20</sup> Txajũ' mar pxãhsu kiwe u'psa vxite' vxix wala jxuka vxitutx. <sup>21</sup> Naapkaçxha' cielujũ kwetuba nasaa kajkwekhẽ ũsxitx seena' walasa pahz açxoba ãh duhsa. Aça' txã'wẽ seena' yũute', nasa yu' jweeĩçxáatx Dxusa's açewe'we', txã'wẽ kastigo seena'sa's kaapha'ga.

## 17

### *U'y kazx pkal yũusa's ivxiituni*

<sup>1</sup> Txajũ' siete angeswe'sx na'wẽ siete kopa ji'phu'tx txãatewe'sx teeçxsa's uythu, aça' adxa's na'wẽk we'we:

—Ayte myuh, na'wẽ u'y kazx yũuna fxi'zesa mar kajkwete kaçxçxa u'pa' txã'sna kastigãywa'ja's pta'sxya'wath. <sup>2</sup> Maa kiwete jxkaahsawe'sxwa txãa u'y yakhçxaçxáatx kazx pkal yũuna fxi'ze', aça' naa kiwete nasa' txãa kazx fxi'zewa'j yuuçxáanatx piyana ũsu'.

<sup>3</sup> Txajũ' adxa' Dxus Espiritu aphniith yuu, aça' Dxus angela' adxa's pe'jna u'kh nasa u'pnimée kiwete. Kxtea' teeçx u'y eçx beh



seena' kazxsa kajkwete a'jçxa u'pteth uy. Aça' txãa eçx seena' kazxsa kakwete yu' Dxusna açewe'wena fxi'jnisaçxáa utak ji'phu', sa' si-ete dxikthé diez kaaçxuk ji'phu'. <sup>4</sup> Txãa u'ya' athni ropa iiméh ew behsak ji'phu', vxyuu beh vxite' kwet zhiçxkwesa vxite' perla iiméh pa'gasa txã'wësa atxhku iijxũ yu'. Sa' kusete yu' vxyuu bee kopa ewmée kazxsaçxaçxáa uta ji'phsa'sku ji'phu'. <sup>5</sup> Sa' dxikthete yu' na'wëk fxi'jni yu': Babilonia çxhab kazx jxtuhthesa kazx yũuwa'ja's kaapiya'jsa jĩnak fxi'jni yu'. <sup>6</sup> Txajũ' jiyuth, txãa u'ya' tũunik yu' Dxus luuçxwe'sx ee vxite' Jesus kaapiya'jni's pta'sxpa'ga ikhni yuutx txãawe'sx ee yakh. Sa' u'y txã'wësa's uyçxa', wala ũukhthu.

<sup>7</sup> Txajũ' Dxus angela' na'jĩ'k:

—¿Kĩh yũuçxa ũukhna ũsga? Kaa-jiyu'jya'wath txãa u'y ma'wësatewa vxite' txãa eçx seena' kazxsa tũ'sna u'jweça' siete dxikthé ji'phçxa diez kaaçxu ji'pha' txã'sna. <sup>8</sup> Eçx seena' kazxsa's uygu txã' nyafxíi yu' ũsu'k, nawa açxha' meea'. Txã'wëçxawa kafx iiméh seena' dxiisajũ kasejena vxituya'. Aça' naa kiwetewe'sx jxukaysa txãawe'sx yase's bagaçxteçxáa yuhwa uuwa'jmée itxĩ fxi'zewa'j librute fxi'jnimeesa yu' wala yuh ũukhutxna txãa eçx seena' kazxsa ki'vxyaana txã'sna uyçxa.

<sup>9</sup> Na'sa' jiyuwa'jsa ũsçxa', mjiyuwe: U'y kaçxçxa u'pa' txãa eçx dxikthé sietesa' siete vxiç walata'. <sup>10</sup> Sa' txãa dxiktheiçxáa siete jxkaahsata'. Txãa jxkaahsawe'sxa' tahçsa yu' vxituyã'jtx, aça' açxha' seistewe'sxa' jxkaahna ũsa', nawa nmehtewe'sx sietesa yu' jxkaajxa'

takhmeya'. Nawa txãa nmehtewe'sxa' jwee yu' txaçxmée jxkaajana. <sup>11</sup> Eçx seena' kazxsa nyafxii yu' üsu'k nawa açxha' meea' txã' jxkaahsa sietesak yu'. Nawa ew jiyute yu', txãaíçxáa jxkaahsa oçxotewe'sx yuuwa'jsa'. Txãa e'su isa jxukate vxituna.

<sup>12</sup> Sa' diez kaaçxu uygu txãa yu' diez jxkaahsawe'sxta'. Nawa txãawe'sxa' jxkaajxa' takhmeyta'. Nawa jxkaahsa yuuwa'ja's jxpagaçtana wala txaçxmeekeuçxáa, eçx seena' kazxsa yakh ja'daçxah. <sup>13</sup> Txãa diez jxkaahsawe'sxa' ma'wẽ yũuwa'ja'swa kxazii ja'daçxah puutx we'weçxa üsta'. Txãasa eçx seena' kazxsa's kçxhãaçxha'jatxna kxteeçxah jxkaah puçxna. <sup>14</sup> Txã'wẽ yũuçxa Piisxakuẽ jĩnisa yakh puiitxna. Nawa Piisxakuẽ jĩnisa yuh pejka knayuuna txãawe'sxtxi', txãa pa'gatey txã' Maatewa Jxthaakwe Çxhãçxhasa', sa' Maa Jxkaahsatewa Jxthaakwe Jxtuhthesa'. Aça' txãa yakh üssa' Dxus peeygãhçxa nwe'wenisata' txãa yakh txutemée fxi'zesa.

<sup>15</sup> Txajũ' Dxus angela' vxite na'wẽsa'swa pta'sxku:

—Na'wẽ u'y kazx pkal yũuna fxi'zesa kaççxa u'pni mar uygu txã' naata': maa kiwete çxhabwa jxuka, nasa majũwe'sxwa fxixfyiçxah we'wesa txãata'. <sup>16</sup> Sa' eçx seena' kazxsa dxikthesu diez kaaçxu uygu txã' jxkaahsa yuuwa'jsata', sa' u'y kazx pkal yũuna fxi'zesa's ahççxa sũpxçxáa wãatajatxna. Txã'wẽ yũuçxa, kakwete çxiçx yu'sa' üçxa ipxte kabutxna. <sup>17</sup> Txãa u'ya's txã'wẽ yũuçxa ivxiitukahn, Dxus ne' jxthãas. Txãa pa'ga txãa jxkaahsawe'sxa' eçx seena'

kazxa's kçxhãaçxa'j pu'çxçxa txã'wẽ yũutxna, Dxus we'weni' kxtey yuukahn. <sup>18</sup> Aça' u'y kaçxçxa u'pte uygu txãa yu' Babilonia çxhab kazx jxtuhthesa', naa kiwete jxkaahsa jxukaysatx txãaçxaçxãa jxkaahna ùssa.

## 18

### *Babilonia vxituni*

<sup>1</sup> Txãa e'su' Dxus angel cielujũ kĩaçteth uy seena' juuna' jxkaahwa'jsa, naa kiwete zhiçxkwe eena' kweethna. <sup>2</sup> Sa' na'jĩnak sus we'we:

—Babilonia çxhab txakwe çxhãçxhasaçxawa, Dxus kastigo's jxpa'gawa'the yã'j ùsa'. Sa' ãçxa' eçxthẽ'j jxkaahni espiritu ewmeesa vxite' vxiçxakwe kazxaçxaçxãa ùswa'j yuuna pa'kh. <sup>3</sup> Txã'wẽ yũukahnii maa çxhabwa jxukaysa txãa pkal kazxsateçxaçxãatx fxi'zena ùsu'. Aça' naa kiwete jxkaahsa jxukaysawe'sx pkal kazx yũuwa'ja's yuuçxãatx piya. Txã'wẽy txweysawe'sxwa wala ji'phsa yuutx, pkalte fxi'zewa'jçxã's txweyna jĩ'k.

<sup>4</sup> Txajũ' cielujũ na'jĩna we'weni wẽse'th:

—Adx nasa yã'ja' txãa çxhabu mkaasehwe, txãa pkalsawe'sx yakh ùsya'mée, kxah txãa çxhabte kastigo' i'kwe'sxtxi's kpajkxmeena.

<sup>5</sup> Na'jĩ'th na': txãawe'sx pkala' iiméh seena' walani' cielute kãhpkaçx, kxajk Dxusa' txãa çxhaba's kastigãyya' yajkx txã'wẽ kazxsapa'ga.

<sup>6</sup> Txãawa vxitetx ma'wẽga ewmée yũu txã'wẽy ewmée myũuwe ka'tuwa. Sa' txãawa ma'wẽga vxitetx juuna' yũu, txãate e'z us thaakwe juuna' myũuwe. <sup>7</sup> Pkxuuna makxũusu'jwe, txãawa

makwega iiwejçx yajkxna pkalte fxi'zena ũsu' txãatey ãh. Sa' txã' na'wêk yaaki' txajx ũuste: Ayte jxkaahsa na'wê kaçxçxa u'pthu. Nmi' ji'phmeesameeth, sa' pxthaa yuuna fxi'zeme'nja sũhnak iiwejçx yaaki'. <sup>8</sup> Txãa pa'ga teeçx enteçxáa kastigo pa'jatxna na'wêsa: nxuswa'j, wêjê, uu en, sa' ipxte kabni yuuna. Txãa çxhaba's Dxus çxhãçxhasa' jxuka ivxiituna.

<sup>9</sup> Aça' naa kiwete jxkaahsawe'sx txãa çxhabte kazx pkal yũuna fxi'zesa' wala nxus we'wena ũ'netxna, txãa çxhavxyni aja's uyçxa. <sup>10</sup> Sa' txã'wê kastigãyni's ũukhçxa, jxu'juçxáa thegutxna na'jina:

—Seena' yuh pxthaa yuuk, Babilonia çxhab txakwe seena' çxhãçxhasa. Naa dudte jxuka vxitunik yuu jĩtxna.

<sup>11</sup> Naa kiwete txweyna fxi'zesawe'sxwa txãa çxhaba's yajkxçxa wala pxthaa we'wena ũ'netxna. Txã'wê yũukahníi ãçxyã'ja' peena yu' kim yuhwa weymeetxna makwe tũ'sna pa'thewa: <sup>12</sup> vxyuu beh, vxyuu çxihme, kwet zhiçxkwe wala pa'gasa, tela zhiçxkwesa iiméh pa'gasa, fxtũu wêt putasá, marfxil zhiçxkwesa, fxtũu ewsa wala pa'gasa, bronce yaasesa, hieçxo yaasesa, marmól yaasesa, kĳkĳhwa txã'wê zhiçxkwe vxitnisa. <sup>13</sup> Vxite' ũ'nisate wêt pēethēsa, kabte wêt putasá, wêt putakahn kakwete sxũsxnisa, vxino, aceite, skuutxh ũ'we ewsa. Vxite' tajkx ktũ'se'jnisa, piisxáa, jiba, kaçxetilxa jiba wezxnisa. Vxite' nasa txweynisa kĳh yuhnawa ya'txweymeena. <sup>14</sup> Sa' txãa çxhaba's na'jĩtxna:

—jTxakwe wala weçxana fxi'zeni's ji'phméek neeyũu, sa' txakwe zhiçxkwe ji'phuni'swa jxukate ivxiituk! jĩtxna.

<sup>15</sup> Txãa çxhabte kĭjkĭhwa txweyçxa wala ji'phsa yuusaawe'sxa' jxu'juçxáa thegna neeyũutxna kastigãyni's ũukhçxa. Sa' wala nxus we'wena ũ'netxna <sup>16</sup> na'jĩna:

—jTxãa çxhab txakwe walasa seena' yuh yuuk! Nyafxíi yu' u'y na'wĕk zhiçxkwe iijxũçxa fxi'ze', ropa iiméh pa'gasa, vxyuu beh ki'pna yu-unisa, kwet zhiçxkwesa iiméh pa'gasaçxaçxáatx txã'wĕsatxku iijxũ'. <sup>17</sup> Nawa txãa ji'phunisa naa dudte jxuka pçuuk jĩtxna. Txã'wĕy barko namuwe'sx, vxite' kxtee mjĭisawe'sx jxukaysa jxu'juçxáa thegna neeyũutxna. <sup>18</sup> Sa' txãa çxhab çxhavxyna sxi'tasa aja's uyçxa', na'jĩna sus we'wetxna:

—Mtee yuhwa naa çxhab na'wĕy walasa yu' meea' jĩna, <sup>19</sup> nxusweete dxikthekhĕ kiwe ya'fxihbna sus ũ'nenana na'jĩtxna:

—Seenana' nxusnxus knayku çxhab txakwe walasa txajx ji'phuni yakh wala ji'phsa vxitku barko ji'phsa yuutxi' jxukaysatx. Nawa naa dudte jxuka vxitunik yuu jĩtxna.

<sup>20</sup> Nawa cielute ũssawe'sx wala yuh mweeçxawe txãa çxhaba's kastigãyni's uyçxa, Jesus jxkaahnisawe'sx vxite' Dxus yuwe pta'sxsawe'sx, Dxus yakh fxi'zesawe'sx jxukaysa. Txãa pa'gatey Dxusa' txãa çxhaba's kastigãyyã'kh, i'kwe'sxtxi ewméé yũupa'ga jĭnik pthũuse.

21 Txajũ' Dxus angel teeçxa' seena' wala çxhãçxhasa ù'khni kwet na'wësa's kiisçxa, markhëk wãatah na'jïna:

—Babilonia çxhab txakwe walasa txã'wë wãataaní yuuna, aç'a' txã'sa' bagaçxte yuhwa peena yu' uymeetxna. 22 Aç'a' txãa çxhab klxi-ikhunsu tukani músika arpa, kuvxy, trompeta txã'wësa pthūusemeetxna. Sa' txãa çxhabte kīh mjīisa yuhwamée yuutxna, sa' ù'khniçxáa yuhwa pthūusemeena. 23 Kxtee pki'taniçxáa yuhwa kweethmeena, sa' boda fxiesta vxitna susniwa peena yu' pthūusemeena. Txãa çxhaba' txweyna ũssawe'sx wala yuh çxhãçxhasatx ji'phu'k, sa' naa kiwetewe'sxtxi jxuka kaypuba'kh dxijxuuçxa. Nawa açxha' kīh yuhwa ji'phmée yuuna jī'k. 24 Txã'wë yuukahní Dxus yuwe pta'sxsawe'sx vxite' Dxus yakh fxi'zesawe'sx vxite' naa kiwete mtee mteewa ikhnisawe'sx eea' jxuka txãa çxhabteçxaçxáak ũs yu'.

## 19

### *Dxusa's cielute weçxana ũsni*

1 Txãa e'su' cielujũ nasa wala kuhsa sus we'weni wëse'th na'jïna:

Kwe'sx Dxus çxhãçxhasa txãa yuuçxáa ewte nvxiit-sa',

Sa' txãa yuuçxáa jxtuhthesa',

Txãa pa'ga kwe'sx Dxusa's weçxaaga.

2 Txãasaíik çxhab txã'wë kazx yūuwa'ja'sçxáa kaapiya'jsa's kastigāy,

Naa kiwete kazx yūuna suwna ũssa's.

Sa' Dxusna selpisaatx ikhpa'ga ka'tuwa Dxusa' kastigãyku jĩ'tx.

<sup>3</sup> Txajũ' ki'kin we'wetx na'jĩna:

—Kwe'sx Dxusa's weçxaaga. Txãa çxhab çxhavxyni aja' bagaçxte yuhwa pçumée sxi'tana nes yuuna jĩ'çpkaçxha', <sup>4</sup> weintikwarto jxkaahsawe'sx vxite' Dxus vxitni itxĩsa pahzsawe'sxa' Dxus jxkaahna u'psa tasxte peejxũkweçxa weçxatx na'jĩna:

—Txã'wẽ yuh ew yuuk. Txãa pa'ga Dxusa's weçxaaga jĩ'tx.

<sup>5</sup> Txãa e'su' Dxus jxkaahna u'pnijũ teeçx na'jĩna we'wenik pthũuse:

Kwe'sx Dxusa's mtuuthe'jwe, txã'sna selpisaawe'sx

Le'çxkwesa ma'k yuu meeçxawa walasa ma'k yuu nawa txã'sçxáana nwēese'jna jxukaysa jĩ'k.

### *Cielute boda fxiesta ãani*

<sup>6</sup> Txajũ' nasa wala kuhsa we'weni na'wēsa'sthū wēse'j txãa yu' kuh yu' susni na'wēk pthũuse', vxite' kpi'sx sus we'weni na'wē. Sa' na'jĩ'tx:

Dxusa's wala yuh weçxaaga, txãa pa'gatey kwe'sx Dxus kĩhtewa jxuka ajãsa txã' jxkaajxa' takhyã'kh.

<sup>7</sup> Aça' seena' wala weçxana txã'sa' tuuthe'jega, txãa pa'gatey Piisxakuẽ jĩnisa nyuu yu-uwa'jsa' ya'pheu'kh,

Aça' boda fxiesta ena' ajxã'kh.

<sup>8</sup> Txãa nyuu yuuwa'jsa' ropa iiméh zhiçxkwe çihmesa's kaathe'jnik yuu jĩ'tx.

(Txãa ropa ewsa yu', Dxus dxi'pte jxpubamée ew fxi'zeni j̄nisa'.)

<sup>9</sup> Txajũ' Dxus angela' na'j̄nak fxi'khaah:

—Piisxakuẽ j̄nisa boda fxiestate pi'kxnisawe'sx yakha' wala yuh weçxa yuja' j̄na kfxi'ja'jçxa', na'j̄nak we'we:

—Na'wẽ we'wenisa' Dxus kwe'we'jnisa isasata' j̄ite', <sup>10</sup> adxa' Dxus angel tasxte neewe'weya' peejxũkweth. Nawa txãa yu' na'j̄i'k:

—Adxa's peejxũkwenu. Adxa' Dxusna selpisáa idx na'wẽysaíçxáath, iidx yakthẽ'jwe'sxwa ma'wẽta Jesus kaapiya'jni isasa's jxpubamée pta'sxna pekũjũ' txã'wẽysath. Aça' Dxusçxáana mneewe'we. Na'wẽ k̄ihwa yũuna j̄na kaavxya'ja'th txãa yu' Jesus ma'wẽsatewa kaajiyu'jsata' j̄i'k.

### *Jiba çxihmete a'jçxa kasehsa*

<sup>11</sup> Txãa e'su' cielu phateçxa ũsteth uy, aça' teeçx jiba çxihmesak vxyaa. Kxte a'jsa yu': Isasaçxá's Kxtey Yuusáa j̄inak kxsusni yu', txãa pa'gatey isasa yu'sa' jxuka kxtey yuuna puiiçxa knayku naa pa'ga. <sup>12</sup> Sa' txajx yafx yu' ipx beesa na'wẽk eena' kweethe'. Dxikthete yu' wala kuh korona ji'phu'k, sa' vxite yase fxi'jni ji'phu'k txãa yase's txãa yuuçxáak jiisa yu'. <sup>13</sup> Txajx athni ropa yu' eete akhnisa'sku jxaath yu'. Sa' txãa yu' Dxus ma'wẽsatewa txã'sna kaajiyu'jsa' j̄nisak yu'. <sup>14</sup> Aça' txãa yakh u'jsa yu' cielutewe'sx jxukaysa jiba çxihmesatetx a'jçxa u'jweç yu', ropa ewsa çxihme atesa's athçxa. <sup>15</sup> Sa' txajx yuwesu yu' espada seena' zeksak s̄hna ũsu', txãa yakh maa kiwetewe'sxtxiwa knaywa'jsa.



Txã'wě yūuçxak maa kiwetewa jxuka juuna' yuuna txãaçxaçxáa juuna' jxkaahwa'jsa yu'. Sa' ewmeesa yuutxi's seena' kastigaína kxūusu'jna, uwatx ku'ssawa ma'wēga seena' yū' txã'wēy yūuna Dxus kīhtewa jxuka ājāsa txã'wě seena' kastigaína. <sup>16</sup> Sa' txajx athni ropate vxite' jī'besu na'jīna fxi'jnik ji'phu': Maa Jxkaahsatewa Jxthaakwe Jxtuhthesa', sa' Maatewa Jxthaakwe Çxhâçxhasa' jīna.

<sup>17</sup> Txãa e'su' Dxus angel sekte yujuçxa ūsteth uy, txã' na'jīnak sus we'we uuniisa çxiçxtxi's ū'sa vxiçxakuēt̄x:

—Jxukaysa pkhaakheçxa myuhwe ū'ya' i'kwe'sx ū'wa'j Dxus ūsku txã's. <sup>18</sup> Sa' ū'wene'kwe uusaawe'sx çxiçx, jxkaahsawe'sx ma'k yuu, npiiçthē'jwe'sx ma'k yuu, nasa iiméh jxtuhthesa ma'k yuu, jiba uuniisa ma'k yuu, jibate a'jsa uusaawe'sx ma'tx yuu, patron ji'phsa ma'k yuu meeçxa' patron ji'phmeesa ma'k yuu, le'çxkwesa ma'k yuu walasa ma'k yuu nawa txãatx jxuka pkhakhçxa mē'we jīnak we'we.

<sup>19</sup> Txajū' uythu eçx seena' kazxsa vxite' naa kiwete jxkaahsawe'sx txajx nasa yā'jçxa jxukaysa pkhaakheçxa txãa jibate a'jsa yakh vxite' txajx nasa yā'jçxa pdxi'puçxa puiiya' ūste.

<sup>20</sup> Nawa eçx seena' kazxsa Kristo's açewe'wesa vxite' eçx kazxsa Dxus yuwe pta'sxsa na'wē kīhwa kaavxya'ja'jçxa kaypuba'jsa txãa yakh e'zīi tudnitx yuu, txã'wē Kristo's açewe'wesa ii-sawa'jni's kaaki'pu'jna eçx seena'sa piisani yuuk txã'snawa neewe'wekahn kaypuba'pha'ga. Txajū' txãa e'zīitx ipx wala asufxre yakh behna ūsa' txkhēe wātāānitx yuu itxītey. <sup>21</sup> Txajū' jibate

a'jsa yuwesu espada seena' zeksa sēhna ũsu'k txãa espadaju ikhnitx yuu nasa ewmeesa yu-utxi's, açã' uuniisa çxiçtxi's vxiçxakwe' txikp-kaçtxi ũ'.

## 20

### *Naa kiwete mil anxupkaçx Kristo jxkaahwa'j*

<sup>1</sup> Txãa e'su' Dxus angel cielujũ kĩaçte uythu, kafx iiméh seena' dxiisatewe'sx lxavxi's atçxa, vxite' çam kadena walasa'sku ji'ph yu'. <sup>2</sup> Sa' txãa angela' eçxthē'ja's tudku mil anxu āhpkaçx. Txã' txãniitey ul weeswée Satanasku yaase yu'. <sup>3</sup> Txã'wē yũuçxa kafx seena' dxiisate kxuuphçxa vxitxte yu' selxok ki'p, maa kiwete'sxtxiwa peena yu' ĩsxīya' kasejkahmén mil ānu āhpkaçx. Txãa mil anxu āhte', txh-weteni yuuna txaçxmeeçxáawa.

<sup>4</sup> Txajũ' jxkaahna ũsnisatxthu uy, açã' kxsũ yu' kastigāyya' ājāwa'jsatx kaçxçxa u'pu'. Vxite' Jesus kaapiya'jni's nwēese'jçxa Dxus yuwe's pta'sxna fxi'zepa'ga dxikthe's spē'thçxa ikhni yuutx txãawe'sxtxiwa uythu. Txãawe'sxa' eçx seena' kazxsa vxite' txãa eçx na'wēysa piisani yuuk txã'sna neewe'wesameetx yu', sa' txãa eçx iisawa'jni's dxikthesu meeçxawa kusesuçxáa yuhwa kaaki'pu'jsameetx yu'. Txãawe'sxa' ki' ĩtxĩ yuuçxa mil anxutx jxkaahna ũsu' Kristo yakh ja'daçxah. <sup>5</sup> Txãawe'sxa' uuçxawa ki' ĩtxĩ yuusaata' nyafxte, nawa vxite uusaawe'sx yu' ĩtxĩ yuumeeta' txãa mil anxu skhēwpkaçx. <sup>6</sup> Dxus yakh yuuçxáa fxi'zeçxa uuniijũwa txãawe'sx khuē'y nyafxte ĩtxĩ yuusáa yakha' seena' yuh

weçxa yuja'. Txãawe'sxa' bagaçxte yuhwa Dxus yakh puutx uywa'jmeete yu' u'jmeetxna. Txãa pa'ga txãawe'sxa' mil anxupkaçx jxkaahna üsutxna, Dxus vxite' Kristo txãawe'sx tasxte selpiina.

<sup>7</sup> Mil anxu skhëwniijũ' eçxthë'ja' tudnijũ tx-hweteni yuuna, <sup>8</sup> sa' ïsxĩina kaypuba'jya' kase-jena naa kiwetewe'sxtxi jxuka, Gog vxite' Magog txãawe'sxtxi. Txã'wë yũuçxa puiiya' pkhakhena Magogwe'sx nasatx. Txãawe'sxa' iiméh seena' kuhta' kwetmuse na'wë. <sup>9</sup> Txãasatx kiwe mak-wetewa jxuka ähçxáa kxaaduu Dxus luuçxtxi vxite' Dxus peeygãani çxhabnawa. Naapkaçxha' Dxusa' cielujũ ipx kaahçxa txãawe'sxtxi' jxuka kabku. <sup>10</sup> Sa' eçxthë'j ïsxĩisa's ipx wala asufxre yakh behna üsu'k kxteek akhni yuu, na'wë eçx kazxsa Kristo's açesa vxite' Dxus yuwe pta'sxsa na'wëy yuuçxa kaypuba'kh txãawe'sxtxi akhni yuutx kxtee. Kxteea' en ma'k yuu kus ma'k yuu nawa bagaçxteçxáa yuhwa kaasewa'jmée çxhavxyna nes yuutxna.

### *Kastigãywa'ja's pta'sxya' kuutxa'jni*

<sup>11</sup> Txajũ' jxkaahna u'pni çxihmesa seena' walasa'sthu uy, vxite' kxtee kaçxçxa u'psa's. Txajx yafxju thegniteçxáa kiwe vxite' cielu wantãimeeçxa jxuka vxitutz, sa' peena yu' vxyaameeta'. <sup>12</sup> Txajũ' uusaawe'sxtxi uythu, walasa ma'k yuu le'çxkwesa ma'k yuu nawa jxuka Dxus tasxte yujuçxa üste. Aça' librutx phadenitx yuu, vxite' bagaçxte yuhwa uuwa'jmée ïtxĩ fxi'zewa'j libru yã'jçxa. Txajũ' uusaawe'sxtxi Dxus tasxte kuutxa'jnitx

yuu, txãawe'sx ma'wẽ yũuna fxi'zesatewa  
 libroute ma'wẽne' fxi'jni ũsu' kxtee thegçxa  
 kastigãywa'ja's pta'sxya'. <sup>13</sup> Yu'khẽ khêeçxa  
 uusaawa ãtxĩ yuuçxa kiitetx, naapkaçxha'  
 kiwe dxiiga pedanisawa ãtxĩ yuuçxa kiitetx.  
 Aça' jxukaysatx teeçxsa na'wẽçxah ma'wẽ  
 yũuna fxi'zesatewa pta'sxçxa kastigãywa'jtx  
 yuu. <sup>14</sup> Txajũ' uu en vxite' uusaawe'sx yã'jçxa  
 infxierno ipx walate akhnitx yuu. Txãa infxierno  
 ipx walate khêenijũ' bagaçxte yuhwa Dxus yakh  
 peena yu' puutx uywa'jme'. <sup>15</sup> Aça' kxteetx akhni  
 yuu bagaçxte yuhwa uuwa'jmée ãtxĩ fxi'zewa'j  
 libroute txãawe'sx yasetx fxi'jnimeesatxi's.

## 21

### *Cielu u'sesa kiwewa u'sesa uyni*

<sup>1</sup> Txãa e'su' cielu u'sesa vxite' kiwewa u'sesath  
 uy. Txã'wẽ yuukahnii nyafxiitey cielu vxite'  
 kiwewa nyafxiiteywe'sxa' skhẽwniitx yuu, aça'  
 kãh mar yuhwa meek yuu. <sup>2</sup> Juan yaasesa adxa'  
 uythu Dxus çxhab Jerusalen u'sesa txã'wẽ Dxus  
 tasxu cielujũ kãjaçte. Txãa çxhaba' seena' ew  
 pheu'jni yu'k, novxia iimi'ya' pheu'jçxa ũythãna  
 ũs na'wẽ. <sup>3</sup> Sa' cielujũ sus na'jãna we'weni  
 wẽse'th:

—Mtheg, açxha' Dxusa' nasaa ksxavxyte ũsa'  
 txãawe'sx yakh fxi'zeya', aça' nasa' Dxus jã yu-  
 utxna. Dxusa' txãawe'sx Dxus yuuya' txãawe'sx  
 yakh fxi'zena. <sup>4</sup> Txãasa Dxusa' kãh nxusniijuwa  
 jxuka nwe'wena, aça' peena yu' uuwa'jmée  
 yuuna. Ũ'newa'j enwa pa'jmeena, nxus

we'wewa'jwa pa'jmeena, akasawa pa'jmeena, txãa pa'gatey nyafxú fxi'zeni ena' skhêwku jĩ'k.

<sup>5</sup> Txajũ' jxkaahnite kaçxçxa u'psa' na'jĩ'k:

—Mtheg, kĩhtxwa jxuka yu'pthehçxa u'seçxaçxáath vxit jxuka jĩçxa', ki' na'wêk we'we:

—Na'wê we'wenisatxi' mfxi'j, txãa pa'gatey txã' isa kxtey yuuwa'jsata' jĩçxa', <sup>6</sup> ki' we'wek:

—Adx we'weni' jxuka kxtey yuunik yuu. Adxa' naa kiwe meetey ũsyã'th yu', sa' bagaçxtewa nes yuuwa'jsath pçuwa'jsamée. Aça' maawa yũ'wêesa's kĩh yuhwa vxyuu pa'gamée ũsu'nja yu' bagaçxte yuhwa uumée kaafxi'ze'jwa'jsana.

<sup>7</sup> Maawa ewmeesa yu'sa' nwêese'jmée jxuka knaysawe'sxa' kĩhwa Dxus jĩi yu'sa' jxuka txãawe'sxçxaçxáa jxpa'gatxna. Aça' adxa' txãawe'sx Dxus yu'nja, naapkaçxha' txãawe'sxa' adx luuçx yuutxna. <sup>8</sup> Nawa maa nasawa Dxusa's çxhãçxha yaakxsamée yã'ja' ya'skaçxa fxi'zesa, kĩhtewa kazxçxáa yũuna fxi'zesa, nasa ikhsa, kazx pkal yũuna fxi'zesa, dxijxuuna fxi'zesa, Dxus ãtxĩmeesatx neewe'wesa, ãsxĩisa txãawe'sxa' infxierno ipx wala asufxre yakh behna ũsa' kxtee khêeya' u'jwa'j ji'phutxna, bagaçxte yuhwa Dxus yakh peena yu' puutx uyya'mée.

### *Jerusalen u'sesa's uyni*

<sup>9</sup> Txajũ' Dxus angel sietesawe'sx na'wê Dxus kastigo nmeh sietesatx ji'phu'tx siete kopate txãa sietesawe'sx teeçxsa' kũhçxa na'wêk we'we:

—Myuh thegya', pta'sxya'wath Piisxakuẽ jĩnisa nyuu yuuwa'jsa's jĩ'k.

10 Naapkaçxa' Dxus Espiritu aphniith yuu, aç'a' Dxus angela' pe'jna u'kh, teeçx thã'j vxiç seena' wala êete. Sa' kxtee kãhçxa', kaavxya'ja'kh Jerusalen çxhab wala Dxus tasxu cielujũ kãisa's. 11 Txãa çxhaba' zhiçxkwe zmeena'k kweethna ũsu', Dxus kweethniju. Sa' txãa zmeena' kweethnisa yu' kwet iiméh zhiçxkwe kwentetesa na'wëk yu'. 12 Sa' txãa çxhab peeku'j yu' kwetçxaçxáak uphni yu', wala êete jxu'j umnisa, sa' doce vxitxku ji'phu'. Sa' txãa vxitx iisa teeçx angeltxi ũsu'. Txãa vxitxsu yu' Israel ji'j docesawe'sx yasetx fxi'jnith u'pu'. 13 Sek kãani ju'gu tekh vxitxtxi u'pu'. Sek khëeni ju'guwa tekh vxitxtxi u'pu'. Sa' thakwe ju'guwa tekh vxitxtxi u'pu', vxite' tasxu ju'guwa kxaz vxitxi. 14 Txãa çxhab peeku'j doce kwet ki'pçxa txãa kajkwesuk kwet uphni yu' txãa iisa doce yasetx fxi'jni yu', na'wë Piisxakuë jïnisa jxkaahnisa docesawe'sx yasetx.

15 Adx yakh we'wesa Dxus angela' ji'phu'k isani metro vxyuu behçxaçxáasa txãa çxhaba's isawa'j, vxite' kxtee vxitx vxite' txãa kwet uph txã'wësatx isawa'j. 16 Çxhaba' pu-utx txakhweçxaçxáak yu' jxu'jya'wa txakhuëy, tapeya'wa txakhuëy. Aç'a' Dxus angela' txãa çxhaba's isani metro yakh isate', dos mil do-scientos kilómetro ji'phu'k jxu'jya' txakhuëy, tapeya'wa txakhuëy, khëete êetewa txakhuëy, puutx txakhweçxaçxáatx yu'. 17 Txajũ' kwet upha'sku isa, aç'a' sesenta y kuarto metrok ji'phu' khëete êete. Kwe'sx isani metro jiitha'w txãa yakhíçxáak Dxus angela' isana ũsu'.

18 Txãa upha' kwet jaspe yaasesa yakhçaxçáak umni yu', aça' çxhab yu' vxyuu behçaxçáak yu', txãasak seena' zhiçxkwe zmeena' vxya'. 19 Kwet upha's kaaçxida'jnisa kwet yuutxi'sa' kwet fxiyfyiy zhiçxkwesa yakhçaxçáatx pheu'jni yu' txã' naata': nyafx-tewe'sxa's, jaspe yaasesa yakh; e'stewe'sxa's, safxiro yaasesa yakh; tekhtewe'sxa's ágata yaasesa yakh; pahztewe'sxa's, esmeralda yaasesa yakh; 20 tahçtewe'sxa's, ónice yaasesa yakh; seistewe'sxa's, kornalina yaasesa yakh; sietetewe'sxa's, krisolita yaasesa yakh; oçxotewe'sxa's, berilo yaasesa yakh; nwewetewe'sxa's, topacio yaasesa yakh; dieztewe'sxa's, krisoprasa yaasesa yakh; oncetewe'sxa's, jacinto yaasesa yakh; docetewe'sxa's amatista yaasesa txã'wësa yakhtxi skadni yu'. 21 Doce vxitxsa yu', perlaçxaxçáatx yu', teeçx perlaçxáa teeçx vxitxte ãjk yu'. Aça' çxhabte klxiikhun wala yu' vxyuu behçaxçáak yu', txãasak zhiçxkwe zmeena' vxyaana nes yu'.

22 Kxteea' pkhaakheni dxuus yat uymeeth, txãa pa'gatey kwe'sx Dxus kïhtewa jxuka ãjãsa txãa çxhabte jxuka ãhçxáak ũsu', Piisxakuë jïnisawa txã'wëy. 23 Txãa çxhaba' sek, a'te, txã'wësa eena' kweethwa'jsa peejxmeek yu', txãa pa'gatey Dxus zmeena' khikhyni yakhçxáa jxukak eena' kweethe', aça' vxite zmeena' kweethsa' Piisxakuë jïnisaiiçxáak yu'. 24 Maa kiwetewe'sxwa Dxus nwe'wenisa' txãa çxhab eena' kweeth-nisu fxi'zetxna, aça' maa jxkaahsawe'sxwa txãa çxhaba's weçxana wala tuuthe'jetxna. 25 Txãa

çxhabte vxitxa' maa enteçxáa yuhwa aphni yu-  
 umeena, txãa pa'gatey çxhi'dxwa'j enwa méé yu-  
 una. <sup>26</sup> Kxteea' wala yuh txãa çxhaba's weçxana  
 tuuthe'jetxna maa kiwejũwe'sxwa. <sup>27</sup> Nawa  
 kazxsa yu' kîh yuhwa u'kameena, ahçena îsxîisa  
 kîjkîhwa ewméé yũusa. Naasáa Piisxakuẽ  
 jînisá libru ji'pha' txãa librute txãawe'sx yasetx  
 fxi'jnisa yuuçxáa u'katxna bagaçxte yuhwa  
 uuwa'jmée îtxî fxi'zewa'jsa.

## 22

<sup>1</sup> Txajũ' Dxus angela' teeçx yu'wala seena'  
 zhiçxkwe çxihme atesa's pta'sxku, bagaçxte  
 yuhwa uumée kaafxi'ze'jwa'jsa's. Sa' txãa  
 yu'a' Dxus jxkaahna ũsni vxite' Piisxakuẽ  
 jînisá txãawe'sx jxkaahna ũsnijũk kasehna  
 ũsu'. <sup>2</sup> Çxhabte klxiikhun walasa pxãhte  
 vxite' yu'wala pukate puutx pdxi'p fxtũutasx  
 buçxaçxa walaana kãhtx, bagaçxte yuhwa  
 uumée kaafxi'ze'jwa'jsa. Sa' txãa fxtũutasxa'  
 a'te iisak yũnna nes yu', txãasak anxute'  
 doce weces yũnu', naapkaçxha' eç yu' yu'çek  
 selpi' maa kiwejũ nasatxwa jxuka. <sup>3</sup> Kxteea'  
 ewmeesa yu' kîh yuhwamée yuuna. Txãa  
 çxhabte' Dxus vxite' Piisxakuẽ jînisá txãawe'sx  
 jxkaahna ũsutxna, naapkaçxha' txãawe'sxtxi  
 selpisaawe'sxa' weçxana neewe'wena nes yu-  
 utxna. <sup>4</sup> Kxteea' Dxus yakh pdxi'puçxa puutx  
 uyya' ãjãtxna, sa' Dxus yase's txãawe'sx dxik-  
 thesu ji'phsa yuutxna. <sup>5</sup> Kxteea' çxhi'dxwa'j  
 enméé yuuna, aça' kxtee fxi'zesa' pki'tawa'jwa  
 peejimeetxna, sa' sek kweethniwa peejimeena,



txãa pa'gately eena' kweethsa' Dxusiçxá'. Aça' kxtee ùssa' багаçxtewa weçxana nes yuutxna.

*Jesukristo kīwa'j en utxa ūsa'*

<sup>6</sup> Txajū' Dxus angela' adxa's na'jīnak we'we:

—Na'wē pta'sxnisa' isa kxtey yuuwa'jsata', aça' txāatxi's isasa yuhtxna sūhna wa'lmée jxpa'gawa'ja'. Txãa pa'gately nyafxii txajx yuwe's pta'sxsawe'sxtxi kaaūusuthe'kh txãa Dxus íçxáak āçxwa txajx angela's kaah, na'wē kīhwa yūuya'wa' jwee yu' jxthēeyuumée txāatx kaajiyu'khan āçxh naa ensu selpisaawe'sxtxi.

<sup>7</sup> Txajū' Jesus we'weçxa':

—Txaçxmey yuwe'nja, aça' naa librute Dxus yuwe's fxi'jni ūsta' txāatx kxtey yūusa' seena' weçxana neeyūutxna jī'k.

<sup>8</sup> Juan yaasesa adxa' txã'wēsathxthu uyna wēse'jna yuu. Sa' txã'wē uyna wēse'jçxa', Dxus angel kaavxya'ja'kh txajx tasxte peejxūkweth neewe'weya'. <sup>9</sup> Nawa txãa yu' na'wēk we'we adxa's:

—Adxa's peejxūkwenu. Adxa' idx na'wēysaiçxáath, iidx yakthē'jwe'sxwa ma'wēta Dxus yuwe's pta'sxna fxi'ze' txã'wēsath, vxite' Dxus librute fxi'jni ūsa' txã'sna kxtey yuusawe'sx na'wēysaiçxáath Dxusna selpisáa. Aça' wejxwa Dxusnaçxáa mneewe'we jī'k.

<sup>10</sup> Txajū' ki' we'wek na'jīna:

—Naa librute Dxus yuwe's fxi'jni ūsa' txã'sa' pta'sxmée yu' yuunu. Txã'wēme' kxtee we'wenisa kxtey yuuwa'j en ājxa'wa'. <sup>11</sup> Aça' txãa en āanijuyā'ja', pta'sxni's nwēese'jsamée yu' jweeíçxáa ewmée kazx yuuna fxi'zetxna,

naapkaçxha' pta'sxni's nwēese'jsa' jweeíçxáa  
Dxus yakh txutemée çxhãçxha fxi'zetxna.

<sup>12</sup> Txajũ' Jesus ki' we'weçxa':

—Txaçxmey yuuyuju'nja. Sa' teeçxsa  
na'wēçxah kīh yũuna fxi'zesatewa txã'wē  
fxi'zepa'ga deweni's jxũçxa yuwe'nja. <sup>13</sup> Adxa'  
naa kiwe meetey ũsyã'th yu', sa' bagaçxtewa  
nes yuuwa'jsath. Adxthu nyafxte ũsya' takh, sa'  
jxuka skhēwtewa adx íçxáa neeyũuwa'jsath  
pçuwa'jsamée.

<sup>14</sup> Maawa athni ropa's yaateçxa ji'phsa  
yakha' wala yuh weçxa yuja', Dxus çxhabte  
vxitxte u'kaçxa kxtee fxtũutasx bagaçxte  
yuhwa uumée kaafxi'ze'jwa'jsa's ũ'ya' u'kasa  
yakha'. <sup>15</sup> Nawa kazx ewmeesawe'sx,  
dxijxuuna fxi'zesa, kazx pkal yũuna fxi'zesa,  
nasa ikhsa, Dxus ítxĩmeesatx neewe'wesa,  
kīhtewa jxuka ĩsxĩwa'jçxá's yajkxna fxi'zesa  
txã'wē yũusawe'sxa' u'kaya' ajãmeeçxa ekaju  
neeyũutxna.

<sup>16</sup> Jesus ki' we'weçxa': Adxa' adx tasxte  
selpisáa angela's kaath, Dxus luuçxwe'sxtxi  
txã'wēsa's jxuka pta'sxkahn. Adxa' nyafx-  
tewe'sxthu, sa' jxkaahsa Davxid ji'the kasehsath.  
Sa' khikhiiçte estrelxa zhiçxkwe eena' kweeth-  
sath jĩ'k.

<sup>17</sup> Aça' Dxus Espiritu vxite' Piisxakuẽ jĩnisa  
nyuu txãawe'sxa' pi'ki'tx:

—Myuh jĩna.

Aça' txã'wē pi'kxni's wēse'jsa' jweeju  
mpa'yawe. Aça' yũ'wēesa' utxaaçxa mpa'gawe  
yu' bagaçxteçxáa yuhwa uuwa'jmeete  
kaafxi'ze'jsa's, kīh yuhwa vxyuu pa'gamée.

18 Dxus yuwe naa librute fxi'jni ũsa' txã'sna nwẽese'jsa jxukaysatx adxa' na'wẽth yu'kxpeje': Dxus yuwe naa librute fxi'jni ũsa' txãate kĩhçxáawa yutxawáatxna açã' txã'wẽ yũusatxi's na'wẽ naa librute kastigo fxi'jni ũsta' txãatx jxpa'gawa'j vxituna Dxusa'. 19 Meeçxawa Dxus yuwe naa librute fxi'jni ũsa' txã'sna kĩhçxáawa ivxiituwáatxna açã' txã'wẽ yũusatxi's Dxusa' puuçmeena txãa fxtũutasx bagaçxte yuhwa uumée kaafxize'jwa'jsa's. Sa' na'wẽ pta'sxna fxi'jni yuuk txãa çxhabetewa ka'ga'jmeena.

20 Txã'wẽ yũuwa'jsa' na'jĩ'k:

—Txaçxmey yuuyuju'nja jĩte', passa':

—Txã'jĩwaççxáawa, wẽt yuuna. Nawa dud myuh, Jesus.

21 Kwe'sxtxi jxpe'jsa Jesukristo' i'kwe'sx jxukaysatx pu'çxhina.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

06da09f4-8d0f-5001-ae8c-0e6aa0131ffd